

POPERA GA ROMAWA JEXMAGÜXÛ GA JAXÖGÜXÛTANÜWA NAMUXÛ GA PAURU

**Pauru rü nüxü narümoxê ga
jema jaxögüxü ga Romaärü
iãnewa jexmagüxü**

1 ¹Pa Chaueneëgüx, chama i Pauru nixĩ i pexçax chanaxümatüxü i nhaã popera. Rü chama nixĩ i Ngechuchu ja Cristuarü duüxü chiixü. Rü chama nixĩ ga Tupana choxü jaxuxü na choxü jamuxüçax na duüxügümaã nüxü chixuxüçax i norü ore i mexü i tüxü maxëxëxü. ²Rü nuxcümaxüchima Tupana nanamu ga norü orearü uruügu na naxümatügüãxüçax ga norü ore i mexü. Rü jemaãcü tüxü nüxü nacuxëê ga nhaã ore i mexü. ³Rü nhaã ore i mexü rü tóru Cori ja Ngechuchu ja Cristuchiga nixĩ. Rü nüma rü woo Tupana Nane na jixü, notürü duüxügürüü nabu ga jexguma nhama ga naãnewa nanguxgu. Rü nuxcümaücü ga ãëxgacü ga Dawítaa nixĩ. ⁴Notürü nümatama ja Ngechuchu rü üü necü nixĩ. Rü jexguma juwa ínadxgu rü Tupana tüxü nüxü nadauxëê na aixcuma Nanexüchi na jixü. Rü nüxna nanaxã ga guxüma ga pora. ⁵Rü Ngechuchu ga Cristugagu nixĩ ga chamaã

namecümaxü rü choxü naxunetaxü ga Tupana na norü puracü chaxüçax. Rü jemacax Ngechuchuégagu choxü namu na guxü i nachüãnewa nüxü chixuxüçax i norü ore na jaxögüãxüçax i duüxügu rü Tupanaga naxinüëxüçax. ⁶⁻⁷Rü pema rü ta, Pa Romacüãxgüx, rü ngëma duüxügütanüwa pengëxmagü jerü Tupanaãxü pejaxögü rü naga pexinüë. Rü nüma rü pexü nangechaü rü marü pexü naxuneta na Ngechuchu ja Cristuarü duüxügu peixigüçax rü ngëma norü duüxügütanüxü na pexigüçax. Rü nhuxmax, Pa Chaueneëgü i Romacüãxgüx, rü chanaxwaxe i nüma ja Tanatü ja Tupana rü tóru Cori ja Ngechuchu ja Cristu pemaã namecümagü rü pexü narüngüxëgü na meã pexü naxüpetüçax rü aixcuma petaãëgüçax.

**Pauru rü nüxü nangüchaü na
íjadauãxü ga jema jaxögüxü ga
Romawa jexmagüxü**

⁸Rü nhuxma rü Ngechuchu ja Cristuégagu Tupanana moxë chaxã

peçax, erü guxũwama i guxũ i naãnewa rü duũxũgü nüxũ nixugügü na aixcuma Cristuaxũ pejaxögũxũ rü Tupanaçax pemaxẽxũ. ⁹Rü nüma ja Tupana choxũ nadau rü nüxũ nacuax na aixcuma guxũguma peçax çajumuxẽxũ. Rü jimaãxũ nixĩ i guxũma i chorü ngúchaũmaã çapuracũxũ rü nüxũ chixuxũ i norü ore i mexũ i Nanechiga. ¹⁰Rü guxũguma nüxna chaca na choxũ ngéma namuxũçax rü ngémaãcü düxwa pexũ íchajadauxũçax ega norü ngúchaũ jixĩgu. ¹¹Erü aixcuma choxũ nangúchaũ na pexũ chadauxũ na pemaã nüxũ chixuxũçax i Tupanaãrü ore na aixcuma meã pejaxögũxũçax rü jexeraãcü peporaexũçax. ¹²Rü ngëxguma ngémaãcü wüxiwa ingëxmagügu, rü tá wüxichigü jigü tataãgüxẽ rü jigüaxũ tanangúchaũxẽẽ. Erü chama rü tá nüxũ chadau na nhuxãcü tórü Coriaxũ pejaxögũxũ rü pema rü tá ta nüxũ pedau na nhuxãcü çajaxõxũ. ¹³Pa Chaueneëgüx, çanaxwaxe i nüxũ pecuax na muẽxpüxcüna pexũ íchajadauxchaũxũ, notürü nhuxmarüta rü choxũ naguxcha. Notürü ngéma petanüwa çaxũxchaũ, erü çanaxwaxe na pemaã nüxũ chixuxũ i Tupanaãrü ore jema toxnamana jexmagüxũ ga duũxũgũmaã nüxũ chixuxũrü. Erü çanaxwaxe i ngéma duũxũgürü meã pejaxögü na ngémaãcü Cristuwe naxĩxũçax i ngéma petanüxũgü i nhuxma tama jaxögũxũ. ¹⁴Rü aixcuma ngéma changuxchaũ erü nümatama ja Tupana choxũ namu na guxũ i duũxũgũmaã nüxũ na chixuxũçax i norü ore. Rü nanaxwaxe i duũxũgü i meã poperaxũ icuáxũmaã nüxũ na

chixuxũ rü duũxũgü i tama poperaxũ icuáxũmaã ta nüxũ chixuxũ i ngéma norü ore. Rü ngëxgumarüũ ta nanaxwaxe na ngéma duũxũgü i cuax nüxũ ngëxmaxũmaã nüxũ na chixuxũ rü ngéma duũxũgü i taxuguma rüxĩnũëxũmaã nüxũ na chixuxũ. ¹⁵Rü ngëmacax, Pa Chaueneëgü i Romagu Āchiügũxũ, rü chama rü marü íçhamemare na petanüwa na çaxũxũ, na pemaã rü ta nüxũ chixuxũçax i Tupanaãrü ore i mexũ.

Tupanaãrü ore rü napora

¹⁶Rü taxuũçaxma naxçax çaxãne i ngéma ore i mexũ. Erü ngéma ore rü napora, rü ngëmamaã nixĩ i napuracũxũ ja Tupana na guxãma ja jixema Cristuaxũ jaxögũxe rü tüxũ nangëxmaxũçax i maxũ i taguma gúxũ. Rü ngéma maxũ, rü Judëugüçaxirachirex nixĩ, notürü i nhuxma rü guxũma i ngéma tama Judëugü ixĩgũxũçax rü ta nixĩ. ¹⁷Rü ngéma norü orewa nixĩ i tamaã nüxũ jaxuxũ ja Tupana na tórü õgaguxicatama jĩixũ na napexewa imexũ. Erü norü ore i umatüxũwa rü nhanagürü:

“Rü jixema tümaãrü õgagu Tupanapexewa mexẽ, rü tá tüxũ nangëxma i maxũ i taguma gúxũ”,

nhanagürü.

Nagagutama nixĩ i duũxũgü inapocuexũ

¹⁸Rü nüxũ tadaugü na Tupana dauxũgüxũ i naãnewa ne namuxũ i norü pocu i ãücümaxũ naxçax i guxũma i

ngēma duūxūgū i tama naga ĩnūēxū rū
 chixexū ũgūxū rū ngēma norū
 chixexūmaā togūaxū naguxchaxēēgūxū
 na tama nūxū nacuaxgūxūcax i ngēma
 ore i aixcuma ixīxū. ¹⁹Rū ngēma
 duūxūgū i chixexū ũgūxū rū meā nūxū
 nacuaxgūchirex na nhuxācū jīxū ja
 Tupana jerū nūmatama ga Tupana rū
 marū nūxū nūxū nadauxēē ga jema.
²⁰Rū woo tama nūxū idaugūgu ja
 Tupana, notūrū guxūma i tacū i
 naxūxūwa nixī i nūxū idaugūxū. Rū
 jexguma noxri naāne naxūxgumama
 nixī ga meāma duūxūgūxū nūxū
 nadauxēēxū na aixcuma Tupana na jīxū
 rū guxūguma na naporaxū. Rū
 ngēmacax i ngēma duūxūgū i chixexū
 ũgūxū, rū taxucūruwama tacūmaā nūgū
 ĩnapoxūgū i Tupanapexewa. ²¹Jerū woo
 nūxū nacuaxgūchirex na nhuxācū jīxū
 ga Tupana, notūrū tama
 nanajauxgūchaū na norū Tupana
 jīxūcax, rū bai na moxē nūxna
 naxāgūxū. Notūrū jema ore ga
 taxuwama mexūguama narūxīnūē, rū
 jemaācū naēchitamare namaxē rū
 jexeraācū chixexūgu narūxīnūē. ²²⁻²³Rū
 nūgū jaxugūegu rū duūxūgū i nūxū
 icuāxū nixīgū notūrū taxuguma
 narūxīnūē. Jerū nūxna nixīgachitanū ga
 Tanatū ja Tupana ja mexēchicū ja
 taguma jucū, na nawe naxīxūcax ga
 norū naxchicūnaḡāgūmare ga duūxūgū i
 juxwaxexūchicūnaḡāmare ixīgūxū rū
 werigūchicūnaḡāmare ixīgūxū rū
 naēxūgūchicūnaḡāmare ixīgūxū rū
 āxtapegūchicūnaḡāmare ixīgūxū. ²⁴Rū
 jemacax ga Tupana rū dūxwa jemawa
 nanawogū ga jema duūxūgū na
 naxūgūāxūcax ga guxūma ga jema

chixexū ga nūxū ngūchaūgūxū rū
 nūgūmaā na naxūgūāxūcax ga
 naxūneārū ngūchaūgū i āne tūxna āxū.
²⁵Rū jemaācū nūxna nixīgachi ga guma
 aixcumaxūchi Tupana ixīcū na nawe
 naxīxūcax ga norū tupanagū ga tama
 aixcuma ixīgūxū. Rū jema Tupana
 ũxūpexewa najumuxēgū rū jemaxū
 nicuaxūūgū, notūrū tama nūxū
 nicuaxūūgū ga Tanatū ja Tupana ga
 naxūcū rū inaxwaxecū na guxūguma
 nūxū icuaxūūgūxū. Rū ngēmaācū jixī.
²⁶Rū jemacax ga Tupana rū dūxwa
 jemawa nanawogū ga jema duūxūgū na
 naxūgūāxūcax ga naxūneārū ngūchaū i
 āne tūxna āxū. Rū aīxruū ga ngexūgū rū
 naxruū ngexūgūmaātama nangēāēgū rū
 tama jatūgūmaā. ²⁷Rū jexgumarū ta ga
 jatūgū rū naxruū jattixūmaātama
 nangēāēgū, rū tama ngexūgūmaā. Rū
 jema naxūneārū ngūchaū ga chixexūgū
 rū nūxū napora na naxruū jatixūmaā
 namaxēxū. Rū jemaācū ga jema jatūgū
 rū nūgūmaā nanaxūgū ga jema
 naxūneārū ngūchaū i āne tūxna āxū, rū
 dūxwa jemagagu niḡaawee rū
 naturaxūnegū. ²⁸Rū jema na tama
 Tupanaxū nacuaxgūchaūxū, rū jemacax
 ga nūma ga Tupana rū dūxwa jemawa
 nanawogū ga jema duūxūgū na norū
 chixexūgu na naxīnūēchaxūcax rū na
 naxūgūāxūcax ga jema chixexū. ²⁹Rū
 dūxwa ga jema duūxūgū rū guxūraūxū
 ga chixexū naxūgū ga Tupanapexewa.
 Rū tama aixcuma meā naxmāxmaā rū
 natemaā namaxē. Rū naxaū rū
 nūgūnaxīcatama nananuāchigūchaū i
 guxūma i tacū. Rū toguāxū
 nachixexēēgūchaū. Rū
 nixāūxāchīwaxegū, rū namāētagū, rū

nanuēwaxe, rü nawomüxēēwaxegü, rü naxüineärü ngüchaũ nüxü napora, rü naxoregütaaxgü. ³⁰Rü chixexümaã toguãxü nixugüe, rü Tupanachi naxaie, rü toguãxmaã naguxchigagü. Rü nügügu naxĩnüēgu rü togüarü jexera nixĩgü, rü nügü nicuaxüügü. Rü naxçax nadaugü na jexera chixexü naxügüxü. Rü tama nanatüga rü naēga naxĩnüēchaũ. ³¹Rü tama inarüxĩnüēchaũ. Rü tama aixcuma najanguxēē i ngēma nüxü jaxugüxü. Rü taxüexüma nangechaügu. Rü tama togüaxü nüxü nangechaũ i taçü rü guxchaxü. Rü tama toguãx nüxü tangechaütümüügu. ³²Rü nümagü i ngēma duüxügü rü meãma nüxü nacuaxgüchirex rü Tupana rü marü namaã nanaxuegu na noxtacüma najuexü i ngēma duüxügü i ngēmaãcü maxēxü. Notürü woo meãma nüxü nacuaxgüchirex i guxüma i ngēma, notürü nanaxügüama i ngēma chixexü, rü nataãēgü ega togü naxüxgu.

**Ngëxguma Tupana duüxügüxü
pocugu, rü tama chixexü naxü, erü
ngēma duüxügü rü norü
chixexügagutama nanapocue**

2 ¹Rü ngēmacax, Pa Duüxüx, rü woo texé cuixĩgu rü taxuacüma Tupanapexewa cugüētüwa cuchogü, ega togüxü cuixuechagu. Erü ngëxguma togüxü cuixuechagu na nachixexü rü cugütama cupocu, erü cuma na cumücüxü cuixuechaxü rü cuma rü ta cunaxü i ngēma chixexü i cumücüxü naxçax cuixuechaxü. ²Rü nüxü tacuax rü Tupana tá nanapocue i ngēma duüxügü i namücügüxü ixugüechaxü. Rü ngëxguma napocueãgu, rü tama

chixexü naxü ja Tupana, erü ngēma duüxügü rü norü chixexügagutama nixü i napocueãxü. ³Rü dücax, Pa Duüxüx, rü ngëxguma togüxü cuixuechagu, notürü cuma rü ta cunaxüxgu i ngēmatama chixexü i nüma naxüxü, çrü nhuxücürüwa tá i nagu curüxĩnüxü na Tupanachaxwa icuicüxü na tama cuxü napocuxüçax? ⁴çRü tüxçüü tama nagu curüxĩnü i ngēma mexü i Tupana cuxçax üxü? Nüma rü poraãcüxüchi cumaã namecüma rü jaxna cumaã naxĩnü rü tama paxa curü chixexüçax cuxü napocuchaũ. çRü nhuxma rü tüxçüü nüxü cuxo? çTama exna nüxü cucuax na Tupana ngēmaãcü cumaã mecümaxü na nüxü curüxoxüçax i curü chixexü rü naxçax na cumaxüxüçax ja Tupana? ⁵Notürü cuma rü tama Tupanaxü cucuáxchaũ rü tama nüxü curüxoxchaũ i curü chixexü. Rü ngēmaãcü cugüçaxtama cunajexeraxēē i curü pocu i tá cujaxuxü i ngēma ngunexü i nagu Tupana napocuexü i ngēma chixexü ügüxü. Rü ngēma ngunexügu rü Tupana tá aixcuma ngēma duüxügümaã nanaxuegu na nhuxäcü tá na napocueãxü. ⁶Rü ngëxguma tá nixü i Tupana nüxü jaxügütanüxü i wüxichigü i duüxü naxçax i ngēma naxügüxü. ⁷Rü maxü i taguma gúxümaã Tupana tá tüxü nanaxütanü ja jixema guxügüma mexü taxügüãcüma naxçax daugüxe na Tupana tümamaã taãxü rü naxçax daugüxe na aixcuma Tupanaxütawa tangugüxü. ⁸Notürü Tupana tá tümamaã nanu rü tá tüxü napocu ja jixema tügügüxicatama rüxĩnüēxē rü tama naga ñnüēchaũxē i ore i aixcuma

ixīxū rū naxçax daugūxe na ngēma chixexū taxūgūxū. ⁹Rū guxūma i ngēma duūxūgū i chixexū ūgūxū rū tá ngūxū ningegū rū poraācū tá chixexū nūxū naxūpetū. Rū ngēma Judéugū i chixexū ūgūxūxīra tá nixī i Tupana inapocuxū. Rū ngēmawena rū tá nanapocue i guxūma i ngēma togū i duūxūgū i chixexū ūgūxū. ¹⁰Notürū ngēma duūxūgū i mexū ūgūxū, rū Tupana tá namaā nataāē, rū tá nanatachigaxēē, rū tá nanataāēxēē. Rū ngēma Judéugū i mexū ūgūxūçaxira tá nixī i ngēma. Rū ngēxgumarū i guxūma i togū i duūxūgū i mexū ūgūxūçax rū tá ta nixī. ¹¹Erū Tupanapexewa rū nawūxigu i ngēma duūxūgū i Judéugū ixīgūxū rū ngēma togū i duūxūgū i tama Judéugū ixīgūxū. Rū guxāma ja texé ja chixexū ūgūxe rū tá tanajaxu i tūmaārū pocu, notürū guxāma ja texé ja mexū ūgūxe rū tá Tupana tūmamaā nataāē. ¹²Rū guxūma i duūxūgū i pecadu ūgūxū i tama nūxū çaxgūxū i ngēma mugū ga Muísé ūmatūxū, rū tá inajarūtauxe. Rū ngēxgumarū ta i guxūma i ngēma pecaduāxgūxū i nūxū çaxgūxū i ngēma mugū ga Muísé ūmatūxū, rū ngēma mugū nūxū ixuxūācūma Tupana tá nanapocue. ¹³Erū Tupanapexewa rū taxuwama name i ngēma duūxūgū i nūxū ĩnūēmarexū notürū tama nagu maxēxū i norū mugū. Notürū ngēma duūxūgū i Tupanaārū mugūga ĩnūēxū nixī i aixcuma Tupanapexewa imexū. ¹⁴Dūcax, i ngēma duūxūgū i tama Judéugū ixīgūxū. Nūmagū rū tama nūxū nacuaxgū i Tupanaārū mugū. Notürū ngēxguma nūēchamatama naxūgūmareāgu i ngēma Tupana tūxū

muxū, rū tūxū nūxū nadauxēē na nūxū nacuaxgūxū i çacū na jīxū i mexū rū çacū na jīxū i chixexū, woo tama nūxū na nacuaxgūchiréxū i Tupanaārū mugū. ¹⁵Erū nacūmagūwatama nixī i tūxū nūxū nadauxēēxū na nūxū nacuaxgūxū na çacū jīxū i mexū rū çacū na jīxū i chixexū. Rū ngēma duūxūgū rū ngēxguma chixexū naxūgūgu, rū naāēwatama nixī i nūxū nacuaxgūxū na nachixexū i ngēma naxūgūxū. Rū ngēxgumarū ta i ngēxguma mexū naxūgūgu, rū naāēwatama nixī i nūxū nacuaxgūxū na namexū i ngēma naxūgūxū. ¹⁶Rū ngēma ngunexū i nagu Tupana Cristuxū namuxū na guxū i duūxūgūxū jacagūxūçax i norū maxūchiga, rū ngēma duūxūgū i tama Tupanaārū mugūxū çaxgūxū rū naāēwa tátama nixī i nūxū nacuaxgūxū na chixexū naxūgūxū rū exna mexū naxūgūxū. Rū ngēxguma tá nixī i nangóxū i guxūma i ngēma chixexū i cūācūma naxūgūxū i duūxūgū, rū ngēma chixexū i nūxūcatama nagu naxīnūēxū. Rū Tupanaārū ore i pemaā nūxū chixuxū nixī i tūxū nūxū çaxēēxū i ngēma.

**Judéugūchiga rū mugū ga
Muísé ūmatūxūchiga**

¹⁷Notürū pema Pa Chaueneēgū i Judéugūx, rū nhaperūgūgū:

“Toma rū Judéugū tixīgū rū meāma nūxū tacuax i Tupanaārū mugū ga Muísé ūmatūxū”, nhaperūgūgū. Rū ngēmaācū nagu perūxīnūē na Tupanapexewa peimexū erū meāma nūxū pecuax i ngēma Tupanaārū mugū ga Muísé ūmatūxū. Rū ngēmaācū

Tupanamaã pegü peicuaxüügü erü nagu perüxĩnüë na Tupana pexũ nangechaũxũ erü Judéugü peixĩgü. ¹⁸Rü nüxũ peixu na meãma nüxũ pecuáxũ i tacü nixĩ i Tupanaãrũ ngúchaũ rü tacü nixĩ i mexũ rü tacü nixĩ i chixexũ. Rü Tupanaãrũ mugüwa naxçax pengúe na naxçax pedauxũ i ngẽma aixcuma mexũ ixĩxũ. ¹⁹Rü pema rü nhaperügügü:

“Toma rü meãma nüxũ tacuax na tanaxucuxẽxũ i ngẽma togü i duũxũgü i tama Tupanaxũ cuaxgũxũ. Rü meãma nüxũ tacuax na itajanawexãchixẽxũ i ngẽma togü i chixexũwa ngẽmagũxũ”, nhaperügügü. ²⁰Rü pema nagu perüxĩnüëgu rü nüxũ pecuax na nhuxãcü penaxucuxẽxũ i ngẽma togü i duũxũgü i tama Tupanaxũ cuaxgũxũ rü nhuxãcü penangúexẽxũ i ngẽma duũxũgü i ngexwacax jaxõgũxũ. Rü ngẽmaãcü nagu perüxĩnüë na togüarü ucuxẽruügü peixĩgũxũ, erü Tupanaãrũ mugüwa pengúe rü ngẽmacax meãma nüxũ pecuax i tacü nixĩ i mexũ rü tacü nixĩ i ore i aixcuma ixĩxũ. ²¹Rü dücax, Pa Chaueneëgü i Judéugüx, pema na togũxũ pengúexẽxũ, çrũ tũxcüũ tama pegütama pengúexẽxũ? Pema nüxũ peixu na tama namexũ na ingĩxũ, çrũ tũxcüũ i pema ipengĩxũ? ²²Rü pema nüxũ peixu na tama namexũ na naĩ i ngemaã ipexũ, çrũ tũxcüũ i pema i ngẽmaãcü pemaxẽxũ? Rü pema na nachĩ pexaixũ i togüarü tupanagünetachicünaxãgü, çrũ tũxcüũ i naxçax pengĩxũ i norü tupaucagüarü ngẽmaxũgü? ²³Pema nüxũ peixu na namexũ i Tupanaãrũ mugü i ümatüxũ, rü petaãë erü meã nüxũ pecuaxgü i ngẽma mugü. Notürü Tupanamaã chixexũ pexüe, erü tama

naga pexĩnüë i ngẽma pexũ namuxũ i norü mugüwa. ²⁴Rü ngẽmacax i Tupanaãrũ ore i ümatüxũwa rü nhanagürü:

“Rü pegagu nixĩ na chixri
Tupanachiga jadexagũxũ i
ngẽma duũxũgü i tama
Judéugü ixĩgũxũ”,

nhanagürü. ²⁵Pema rü pegü ípewiechaxmüpexechiraügü na Tupanaãrũ duũxũgü peixĩgũxũçax. Rü name nixĩ na penaxixũ i ngẽma, ega aixcuma naga pexĩnüëgu i Tupanaãrũ mugü. Notürü ngẽxguma chi tama naga pexĩnüëgu i Tupanaãrũ mugü, rü woo Judéugü peixĩgügu, notürü Tupanapexewa rü taxuwama pexũ name i ngẽma na pegü ípewiechaxmüpexechiraügũxũ. ²⁶Rü ngẽma togü i duũxũgü i tama nügü íwiechaxmüpexechiraügũxũ, rü woo tama ngẽma naxügügu, notürü Tupanaãrũ duũxũgü tá nixĩgü ega naga naxĩnüëgu i norü mugü. ²⁷Rü dücax, Pa Chaueneëgü i Judéugüx, rü ngẽma duũxũgü i tama íwiechaxmüpexechiraügũxũ notürü naga ñnüxũ i Tupanaãrũ mugü, rü ngẽma duũxũ rü tá Tupanapexewa pexũ nixu na nhuxãcü pechixexũ. Rü ngẽmaãcü tá pexũ naxüpetü erü tama naga pexĩnüë i Tupanaãrũ mugü i woochirex na nüxũ pecuáxũ i ngẽma mugü, rü woochirex na ípewiechaxmüpexechiraügũxũ. ²⁸Rü dücax, rü tama ngẽma na Judéuxacügü peixĩgũxũçax nixĩ na aixcuma Tupanaxãcügü peixĩgũxũ. Rü tama ngẽma na ípewiechaxmüpexechiraügũxũçax nixĩ na Tupanaãrũ duũxũgü peixĩgũxũ. ²⁹Erü jixema aixcuma túmaãrũ maxũnewa Tupanaga ñnüxë tixĩ ja aixcuma Tupanaxãcü ixĩxë. Rü ngẽxguma aixcuma

taāēwa jaxōxgu nixī i aixcuma Tupanaārū
ixīxū. Rū Tupanaāē i Ūinexū nixī i tūxū
rūngūxēēxū na jaxōxūcax, rū tama ngēma
mugū ga Muisé ūmatūxūgagu nixī. Rū
jixema aixcuma Tupanaārū ixīxē, rū
Tupana rū tūmamaā nataāē woo duūxūgū
tama tūmamaā taāēgūgu.

3¹¿Rū nhuxma rū tacūwa tūxū
namexū na Judéugū ixīgūxū? ¿Rū
tacūwa namexū na
fiwiechaxmūpexechiraūgūxū? ²Rū
poraācūxūchima tūxū name na Judéugū
ixīgūxū. Jerū nūma ga Tupana rū
tūxnaxūchi nixī ga naxāāxū ga norū
mugū i ūmatūxū. ³¿Rū tacū tá
ngupetūxū i nhuxma ega nhuxre i
tatanūxū i Judéugū rū tama meā
janguxēēgūāgu i ngēma Tupana tūxū
muxū? ¿Rū pexcax rū ngēmacax
tāūxūtāma janguxēēāxū ja Tupana i
ngēma tamaā inaxunetaxū? ⁴Rū tama
ngēmaācū nixī. Erū woo guxū i duūxūgū
rū jadorataaxgūgu, notūrū Tupana rū
taguma nidora rū guxūguma najanguxēē
i ngēma nūma tamaā inaxunetaxū. Rū
jemacax norū ore ga Dawī ūmatūxūwa
rū nhanagūrū:

“Cumax, Pa Tupanax, rū aixcuma
nixī i curū ore i nūxū cuixuxū.
Rū ngēxguma cuxū
tangugūgūgu rū nūxū tadaugū
na aixcuma cumexū”,
nhanagūrū. ⁵Notūrū duūxūgū rū ínatiē
erū nhanagūrūgū:

“Rū nūētama nixī na chixexū ixīgūxū
erū ngēmaācū jexeraācū nangox na
namexū ja Tupana”, nhanagūrūgū. Rū
nhanagūrūgū ta:

“Rū ngēxguma chi tórū chixexūgagu
jexeraācū nangoxgu na aixcuma

namecūmaxū ja Tupana, rū maneca
tama name ja Tupana ega tórū
chixexūcax tūxū napocuegu”,
nhanagūrūgū. ⁶Notūrū ngēma nhaxūgu
na naxīnūēxū i duūxūgū rū poraācū
ínatiē, erū tama ngēmaācū nixī. Erū
ngēxguma chi tama namexgu ja Tupana,
¿rū nhuxācū chi i meā duūxūgūxū
jacagūxū i naāneārū guxgu? ⁷Notūrū i
duūxūgū rū nhanagūrūgū:

“Rū ngēxguma chi chorū chixexūgagu
jexeraācū nangoxgu na nhuxācū
aixcuma namexū ja Tupana, ¿rū tūxcū
jīxū i choxna naçaxū naxcax i chorū
chixexū rū choxū napocuxū naxcax i
ngēma?” nhanagūrūgū. ⁸Notūrū ngēma
nhaxūgu na naxīnūēxū i duūxūgū rū
poraācū ínatiē. Erū ngēxguma chi
aixcuma jixīgu i ngēma nagu naxīnūēxū
i duūxūgū, rū chi narūmemaē nixī na
jexeraācū chixexū naxūgūxū na
jexeraācū mexū na ínguxuchixūcax. Rū
dūcax, Pa Chaueneēgūx, nangēxma i
chixexū i duūxūgū i choxū
ūgagūmarexū i nūxū ixugūexū na
ngēma jīxū i chorū nguxēētai
duūxūgūxū namaā changūxēēxū.
Notūrū ngēma duūxūgū i ngēma
nhagūxū rū nagagu tátama napocue.

Guxāma i jixema rū tipecaduāxgū

⁹¿Rū nhuxācū nixī i nhuxmax? ¿Pexcax
rū jixema i Judéugū rū togū i duūxūgūarū
jexera Tupanapexewa imexū? Pemaā
nūxū chixu rū tama ngēmaācū nixī. Erū
guxūma i duūxūgū i Judéugū ixīgūxū rū
guxūma i duūxūgū i tama Judéugū
ixīgūxū, rū pecadutūūwatama
nangēxmagū. ¹⁰Erū Tupanaārū ore i
ūmatūxūwa rū nhanagūrū:

“Rū tataxuma ja texé ja aixcuma
 Tupanapexewa mexē, rū bai ja
 wūxie. ¹¹Rū tataxuma ja texé ja
 aixcuma nūxū cuāxe i
 Tupanaārū ore na nhuxācū
 nanaxwaxexū na naxcax
 imaxēxū. Rū tataxuma ja texé
 ja aixcuma Tupanacax dauxe.
¹²Rū guxāma ítattie, rū guxāma
 itajarūtauxe rū chixexū taxūgū i
 Tupanapexewa. Rū tataxuma ja
 texé ja aixcuma mexū ūechaxe,
 rū bai ja wūxie. ¹³Rū tūmaāx rū
 wūxi i juetamaxū i ingenaxūrū
 nixī erū ngēma ítanaxūxūxēē i
 nagúxūraūxū i dexa i chixexū.
 Rū tūmaārū conūmaā rū
 poraācū tidorae. Rū ngēma
 tūmaārū dexa rū nhama
 āxtapegupūtachatarūū nixī erū
 togūxū nachixexēē. ¹⁴Rū
 chixexū i ore i duūxūgūāēwa
 ngúxūmaāxīcatama tidexagū.
¹⁵Rū ítamemare na duūxēxū
 timáxū. ¹⁶Rū ngextá ítaxīxūwa
 rū togūxū tachixexēē rū
 tanangechaūxēē rū chixexūgu
 tanajixēē. ¹⁷Rū tama nūxū
 tacuax na nhuxācū togū i
 duūxūgūxū tangechaūgūxū rū
 meā natanūwa tamaxēxū. ¹⁸Rū
 tama nūxū tacuáxchaū na
 Tupanaxū tamuūēxū”,

nhanagūrū i ngēma ore i ūmatūxūwa.
¹⁹Rū nūxū tacuax ga Tupana rū
 Judégūna nanaxā ga norū mugū na
 naxauregūāxūcax rū tama nūgū
 ínatagūxūcax. Notūrū taxúema aixcuma
 naga taxīnū i ngēma mugū. Rū
 ngēmacax taxucūrūwa texé

Tupanapexewa tūgūétūwa tachogū i
 ngēxguma Tupana tūxū icagūgu i
 tūmaārū pecaduchiga. ²⁰Rū nhuxma
 taxúema aixcuma naga ínūēxū i ngēma
 mugū, rū ngēmacax taxucūrūwama texé
 tūgū tixu na ngēma mugū
 taxaurexūgagu Tupanapexewa tamexū.
 Erū ngēma mugū tūxū nūxū cuaxēēxū
 nixī na poraācū ipecaduāxgūxū.

**Tórū ōgagu nixī i
 Tupana tūxna naxāxū i maxū**

²¹⁻²²Rū nhuxma na taxucūrūwama
 Tupanapexewa tūxū jamexēēxū i ngēma
 mugū, rū ngēmacax ja Tupana rū tūxū
 nūxū nacuaxēē na nhuxācū jīxū i tūxū
 jamexēēxū na napexewa imexūcax. Rū
 pemaā nūxū chixu rū Ngechuchu ja
 Cristuaxū na jaxōgūxūgagu nixī i tūxū
 jamexēēxū ja Tupana na aixcuma
 napexewa imexūcax. Rū jema mugū ga
 Muīsé ūmatūxū rū jema ore ga
 nuxcūmaxūgūxū ga orearū uruūgū
 ūmatūxū rū tūxū nūxū nacuaxēē i
 ngēma. Rū jema mexū ga Tupana taxcax
 ūxū ga jexguma nūma namuāgu ga
 Nane na tórū pecadu naxūtanūxūcax, rū
 guxū i duūxūgū i jaxōgūxūcax nixī, erū
 Tupanapexewa rū nawūxigu i guxūma i
 ngēma duūxūgū. ²³Rū guxāma
 tīpecaduāxgū rū nūxna tajaxūgūgu ja
 Tupana ja tūxū maxēxēēcū. ²⁴Notūrū ga
 Tupana rū poraācū tamaā namecūma rū
 jemacax tūxū nangetanūācūma tūxū
 nīmexēēgū na napexewa imexūcax. Rū
 nhuxma rū tūxū nangēxma i maxū i
 taguma gūxū, jerū Ngechuchu ja Cristu
 rū marū tūxū nanaxūtanū ga tórū
 pecadugū. ²⁵⁻²⁶Rū Tupana rū aixcuma
 nūma nanamu ga Cristu na najuxūcax

rū jemaãcü tórü pecadu naxütanüxüçax na Tupana tüxü nüxü ngechaũxüçax i ngëxguma aixcuma Cristuaxü jaxögügu. Rū jemaãcü nanaxü ga Tupana na tüxü nüxü nadauxëëxüçax na nhuxäcü nūma nügüçax tüxü jamexëëxü na aixcuma napexewa imexüçax. Rū nuxcüma ga Tupana rū jaxna namaã naxīnū ga duũxügü ga jexguma chixexü naxüegu, rū tama paxa nanapocue. Rū nhuxma rū ta tüxü nanawex na nhuxäcü aixcuma namexü i ngëma nūma naxüxü erü tüxü ínanapi i tórü pecadugü. Rū ngëmaãcü tüxü nüxü nadauxëë na nhuxma rū ta aixcumacü jīixü i ngëxguma tüxü jaxuxgu na napexewa marü timexü ja guxāma ja jixema Ngechuchuaxü jaxögüxe. ²⁷Rū ngëmacax i nhuxma rū taxucürüwama jigü ticuaxüügü rū nüxü tixu na jixematama jigü imexëëgüxü i napexewa. Erü taxucürüwama texé tügü tamexëë i Tupanapexewa. Rū tama ngëma na naxaurexüçax i ngëma mugü nixī i imexü, rū tama ngëma na mexü ixügüxüçax nixī i imexü. Notürü Tupanapexewa time i nhuxma, erü Cristuaxü tajaxögü. ²⁸Rū jixema nüxü tacuax rū ngëxguma Cristuaxü jaxögügu nixī i Tupanapexewa imexü, rū tama ngëma mugü na ixaregüxüçax nixī i napexewa imexü. ²⁹¿Exna pexçax rū Tupana rū Judéugüarü Tupanaxīcatama jīixü? ¿Rū tama exna i ngëma togü i duũxügüarü Tupana rū ta jīixü? Ngëmaãcüx, ngëma togü i duũxügü i tama Judéugü ixīgüxüärü Tupana ta nixī. ³⁰Rū nüxü tacuaxgü na nangëxmaxü ja wüxitama ja Tanatü ja Tupana. Rū guxüma i duũxügü i Cristuaxü jaxögüxü, rū nūma ja Tupana

rū najamexëë na napexewa jamexüçax. Rū ngëmaãcü i nūma ja Tupana rū Judéugüxü nimexëë i ngëxguma jaxögüägu. Rū ngëxgumarüü ta najamexëë i guxüma i togü i duũxügü i ngëxguma Cristuaxü jaxögüägu. ³¹Rū nhuxma na Cristuaxü jaxögüxü, rū bexmana nagu perüxīnūë na ngëmaãcü ijanaxoxëëxü i ngëma mugü. Notürü tama ngëmaãcü nixī. Erü nhuxma na Cristuaxü jaxögüxü rū aixcuma tajanguxëë i ngëma Tupana tüxü muxü.

**Abráü rū Tupanaãxü najaxō
rū jemacax Tupana nüxü
nixu na namexü**

4 ¹Rū nhuxma rū nhuxü nhagüxü tá i nachiga ga nuxcümaücü ga tórü oxī ga Abráü? ¿Rū nhuxäcü nixī ga nüxü naxüpetüxü ga Tupanapexewa? ¿Rū tüxücüü jīixü ga Tupana nüxü ixuxü ga Abráü rū mecü na jīixü? ²⁻³Rū dücax, jexguma chi wüxi ga norü puracü ga mexüçax Tupanapexewa namexgu ga Abráü, rū jexguma chi waxi nixī ga nüxü najexmaxü ga tacüçax nügü na jacuaxüüxü. Notürü taxuüçaxma Tupanapexewa nügü nicuaxüü ga Abráü, erü Tupanaärü ore i ümatüxüwa rū nhanagürü:

“Abráü rū Tupanaãxü najaxō, rū jemacax Tupana nanajaxu rū nüxü nixu na namexü”,
nhanagürü i ngëma ore. ⁴Rū ngëxguma texé wüxi i puracü üxgu rū tüxü naxütanügu rū woetama tūmaärü natanü nixī rū tama āmare nixī i ngëma. ⁵Notürü tama ngëmaãcü nixī i ngëxguma Tupanaãxü jaxōxgu. Erü ngëxguma jaxōxgu, rū tama tacü rū

puracū i mexūcax nixī i Tupanapexewa imexū, notürü Tupanapexewa time erü tajaxō. Rū ngēmaācū Tupana tūxū najaxu ja jixema jaxōxē woo taxuūma i tacū rü puracū i mexū taxūxgu na ngēmacax Tupana tūxū rüngūxēxū.

6Rū nuxcūmaūcū ga aēxgacū ga Dawí rü ta tūmachiga nidexa ga guxema duūxē ga jaxōxē. Rū nüxū nixu ga na tataāxū ga guxema duūxē jerü Tupanapexewa tame, woo tama tacū rü mexū taxūxgu na jemaācū Tupanapexewa tamexūcax.

7Rū nüma ga Dawí rü nhanagürü:

“Rü tataāxēgü ja jixema duūxēgü ja Tupana tūmaārü chixexūgūxū ngechaūxē rü tūmaārü pecadugūxū ijanangūmaxē. 8Rū tataāxē ja jixema duūxē ja Tupana tama tūxū nagu rüxīnūxē i tūmaārü pecadu”,

nhanagürü ga Dawí. 9Rū dücax, ¿pexcax rü ngēma taāxē rü ngēma duūxūgü i Judégü ixīgūxūcaxicatama jīxū, rü exna ngēma togü i duūxūgūcax ta jīxū? Dücax, rü marü pemaā nüxū tixu rü Tupanapexewa name ga Abráü jerü najaxō. Rū jemacax Tupana nanajaxu.

10¿Notürü nhuxgu nixī ga najauxāxū?

¿Exna marü

ínawiechaxmüpexechiraūguwena, rü exna naxūpa ga na ínawiechaxmüpexechiraūxū? Rū pemaā nüxū chixu rü naxūpa nixī ga na Tupana najaxuxū ga Abráü. 11Rü Tupana najaxuxguwena nixī ga ínawiechaxmüpexechiraūxū ga Abráü. Rū jema nixī ga norü cuaxruū ga nawa nüxū nacuáxū na aixcuma Tupana marü najaxuxū rü nüxū nadauxū na namexū jerü nüxū najaxō. Rū ngēmacax i

nhuxma ja Abráü rü tūmanatü jīxū ja guxāma ja jixema jaxōgūxe woo tama ítawiechaxmüpexechiraūgūgu. Rū ngēmaācū ja Tupana rü tūxū najaxu ja guxāma ja jixema jaxōgūxe, rü tūxū nadau na timexū erü tajaxōgü. 12Rü ngēxgumarūü ta ja Abráü rü tūmanatü nixī ja guxāma ja jixema íwiechaxmüpexechiraūgūxe rü Abráürüü jaxōgūxe. Notürü tama ngēma na tūgü

ítawiechaxmüpexechiraūgūxūcax nixī i tūmanatü jīxū. Notürü tūmanatü nixī erü tajaxōgü jexgumarūü ga na jaxōōxū ga nüma ga tanatü ga Abráü naxūpa ga na ínawiechaxmüpexechiraūxū.

Abráü rü Tupanaāxū najaxō rü jemacax Tupana najanguxēē ga norü uneta ga Abráümaā nüxū jaxuxū

13Rü Tupana rü Abráümaā inaxuneta na nüma ja Abráü rü guxūma i naxruū jaxōgūxū rü tá na najauxgūāxū i nhama i naāne na noxrü jīxūcax. Notürü tama jema na mugü naxaurexūcax nixī ga Tupana jemaācū Abráümaā ixunetaxū. Notürü jemaācū namaā inaxuneta jerü Abráü najaxō, rü jemacax Tupanapexewa name. 14Notürü ngēxguma chi ngēma duūxūgü i mugü aregūxūcaxicatama jixūgu i ngēma Tupanaārü uneta, rü notūcaxmamare chi nixī i ngēma na jaxōgūxū, rü chi ngēma Tupanaārü uneta rü taxuwama name. 15Nüxū tacuax rü ngēma mugü ga Muísē umatūxū rü pocuwa tūxū naga erü taxūema aixcuma meā tajanguxēē. Notürü jexguma chi natauxguma ga jema mugü rü tataxu chima na texē

chixri janguxēēxū. ¹⁶Rū jexguma Tupana Abráūmaā ixunetagu na nūxū tá nangūxēēxū, rū Abráūārū ōgagu nixī ga namaā inaxunetaxū. Rū ngēmacax i guxāma i jixema na Abráūrūū jaxōgūxū rū taxcax ta nixī ga jema Tupanaārū uneta ga Abráūmaā nūxū jaxuxū. Rū ngēmawa nūxū tacuax rū tama Jíxema mugū auregūxecaxicatama nixī i ngēma Tupanaārū uneta, notürü guxāma ja jíxema Abráūrūū Tupanaāxū jaxōgūxecax ta nixī. Rū nhuxma rū guxāma i jixema na Abráūrūū meā jaxōgūxū rū Abráūxácūgū tixīgū rū nūma rū tanatū nixī i Tupanapexewa jerū nūxīra najaxō. ¹⁷Rū Tupanaārū ore i ūmatūxūwa rū Abráūchigaxū nixu rū nhanagürü:

“Rū muxūma i duūxūgūnatū tá cuxū chixīxēē”,

nhanagürü. Rū Abráū rū Tupanaāxū najaxō, rū jemacax Tupana najanguxēē ga norū uneta ga namaā nūxū jaxuxū. Rū jima Tupana nixī ja wena namaxēxēēcū i juexū. Rū jimatama nixī ja naxūcū i ngēma woo nhuxma taxuxū. ¹⁸Rū nūma ga Abráū rū aixcuma najaxō ga jexguma Tupana nūxū nhaxgu:

“Rū tá namuxūchi i cutaagū”, nhaxgu. Rū woo ga Abráū ga marū jaguāxūchichirex na jīxū rū na nangexacūxū, notürü najaxōōma ga jema Tupanaārū uneta rū meā ínananguxēē na wūxi ga nane tá nūxū jexmaxū. Rū jemaācū ningu na muxūma i duūxūgūnatū jīxū, jema Tupana namaā nūxū ixuxūrūū. ¹⁹Rū Abráū rū wixguxuchi 100 ga taunecū nūxū najexma ga jexguma. Notürü tama inajarūmaāchi ga na jaxōōxū woo nūxū

na nacuáxū ga paxa tá na najuexū ga nūma rū namax ga Chara rū marū poraācū nangupetüarū taunecūāxgūxū ga na naxāxácūgūxūcax. ²⁰Rū jemaācū ga Abráū rū najaxōōma na nūxū tá najexmaxū ga wūxi ga nane jema Tupana namaā ixunetaxūrūū. Rū tama nagu narūxīnū na Tupana ngürüāchi nawomūxēēxū. Notürü jexeraācū Tupanaāxū najaxōōma, rū nūxū nicuāxū. ²¹Rū aixcumaxūchi najaxō na naporaxū ja Tupana na janguxēēāxūcax i guxūma i ngēma norū uneta. ²²Rū jemacax ga Tupana rū nūxū nixu na napexewa namexū ga Abráū. Jerū Tupana nūxū nadau ga nhuxācū aixcuma nūxū na jaxōōxū. ²³Rū tama Abráūchigaxicatama nixī ga naxūmatūxū ga Tupanaārū ore ga nhaxū:

“Rū Tupana rū nūxū nixu na

napexewa namexū ga Abráū, jerū nūxū nadau ga nhuxācū aixcuma nūxū na jaxōōxū”,

nhaxū. ²⁴Notürü guxāma i jixema na jaxōgūxūchiga ta nixī i ngēma ore. Erū Tupana rū tórū ōgagu tūxū nade na napexewa imexū i jixema i nūxū na jaxōgūxū ja jima juwa tórū Cori ja Ngechuchuxū írūdaxēēcū. ²⁵Rū Ngechuchuxū nixī ga namuxū ga Tupana na tórū pecaducax najuxūcax. Rū nhuxmachi nūma ga Tupana rū wenaxārū Ngechuchuxū ínarūdaxēē na nagagu imexūcax i Tupanapexewa.

Nhuxma rū Tupanapexewa tame erū Cristuaxū tájaxōgū

5 ¹Rū nhuxma rū Tupanapexewa time erū tájaxōgū. Rū ngēmacax marū tama Tupanamaā taxuwanūāxgū i

nhuxmax, erü tórü Cori ja Ngechuchu ja Cristu rü marü tamaã nanangüxmüxëẽ ja Tupana. ²Rü Cristugagu nixĩ na tamaã namecümáxũ ja Tupana i nhuxmax erü tajaxögü. Rü nüxũ tacuax rü guxũgutáma tamaã namecüma. Rü tataãëgü erü nüxũ tacuax na tüxũ tá nangëxmaxũ i tachica i mexũ i Tupanaxütawa. ³Rü ngëxgumarüũ ta tataãëgü i woo ngúxũ ingegügu. Erü nüxũ tacuax rü ngëma ngúxũ rü tüxũ narüngüxëẽ na jexeraãcü iporaexũ rü jaxna namaã ixĩnüëxũçax. ⁴Rü ngëxguma jaxna namaã ixĩnüëgu rü Tupana rü tamaã nataãë. Rü ngëma na tamaã nataãëxũ rü ngëmacax meã ítananguxëẽ na tüxũ tá nangëxmaxũ i tachica i mexũ i Tupanaxütawa. ⁵Rü nhuxma na ínananguxëẽxũ na tüxũ tá nangëxmaxũ i tachica i Tupanaxütawa, rü ngëmacax taxuũçaxma tangechaũgü. Erü Tupana rü poraãcü tüxũ nangechaũ. Rü ngëma Naãë i Üünexũ i tüxna namuxũ nixĩ i tüxũ nüxũ cuaxëëxũ i ngëma. ⁶Rü jexguma taxucürüwama jigütama imaxëxëëgu, rü nawa nangu na Tupana janguxëëxũ ga jema norü uneta. Rü jexguma nixĩ ga nhama ga naãnewa namuãxũ ga Cristu na pecaduãxgüxũçax najuxũçax. ⁷Rü tama natauxcha na wüxie ru to i duũxũçax tajuxũ, woo wüxi i duũxũ i mexũçax jixĩgu. Rü woo tangëxmagu ja texé ja naxçax juchaũchiréxe i wüxi i duũxũ i aixcuma mexëchixũ, notürü tama tüxũ natauxcha i ngëma. ⁸Notürü Tupana tüxũ nüxũ nadauxëẽ na nhuxãcü tüxũ nangechaũxũ jerü jexguma ipecaduãxgügu nixĩ ga taxçax najuxũ ga Cristu. ⁹Rü nhuxma rü Tupanapëxewa

time jerü taxçax naju ga Cristu. Rü ngëmacax meãma nüxũ tacuax rü nüma rü aixcuma tá tüxũ ínananguxëẽ na tama tüxũ napocuxũçax ja Tupana. ¹⁰Rü jexguma norü uwanügü ixĩgügu, rü nümatama ga Tupana rü nügümaã tüxũ narüngüxmüëxëẽ ga jexguma najuxgu ga Nane. Rü nhuxma na marü namaã irüngüxmüëxũ, rü jexeraãcü nüxũ tacuax na tüxũ nangëxmaxũ i maxũ i taguma gúxũ nagagu na namaxũxũ i nümax. ¹¹Rü tama ngëxícataama nixĩ. Notürü i nhuxma rü tórü Cori ja Ngechuchu ja Cristugagu rü Tupanamaã tataãëgü, jerü Cristugagu nixĩ ga Tupana ga tamaã nangüxmüxũ.

Adáũchiga rü Cristuchiga

¹²Rü wüxitama ga jatü ga Adáũgagu nixĩ ga nhama ga naãnewa nangóxũ ga pecadu. Rü pecadugagu nixĩ ga ínaxügüxũ na najuexũ ga duũxũgü. Rü jemaãcü guxũma ga duũxũgüwa naxüe na najuexũ, jerü guxũma nipecaduãx. ¹³Rü naxüpa na Tupana Muíséna naxãxũ ga jema mugü ga naxümatüxũ, rü duũxũgü rü chixexũ naxügüecha, rü jemacax najue. Notürü jema mugü rü taũta najexma ga jexguma, rü jemacax taxucürüwa texé nüxũ tixu ga jema duũxũgü ga na chixri naga naxĩnüëxũ ga jema mugü. ¹⁴Rü jema duũxũgü ga Adáũwena buexũ rü tama Adáũrüũ nanangóx ga jema ori ga Tupana nüxna chuxuxũ. Notürü chixexũ naxügü, rü jemacax najue. Rü jemaãcü nixĩ nhuxmata Tupana Muíséna naxã ga jema mugü ga naxümatüxũ. Rü Adáũwa ínaxügü na najuexũ ga duũxũgü, notürü Cristuwa ínaxügü na najaxuxũ i maxũ i

taguma gúxŭ. ¹⁵Notürü jema chixexŭ ga Adáú üxŭ rü taxuacü nagu tanangu i ngēma āmare ga Tupana tüxna āxŭ, erü tama namaã nawüxigu. Rü aixcuma nixŭ ga wüxi ga jatüiarü chixexŭgagu na najuexŭ i guxŭma i duüxŭgü. Notürü tama jemaãcü tamaã nanaxü ga Tupana. Jerü nüma rü tüxŭ nangetanüãcüma núma nanamu ga Nane ja Ngechuchu ja Cristu na tórü pecaducax najuxŭcax. Rü jemaãcü guma Cristugagu Tupana nanamaxëxëe i muxŭma i duüxŭgü. ¹⁶Rü jema pecadu ga Adáú üxŭ rü taxuacüma nagu tanangu ga jema āmare ga Tupana tüxna āxŭ. Jerü wüxitama ga Adáúärü pecadugagu, rü Tupana nüxŭ nixu rü tá naju naxcax ga jema. Notürü Ngechuchu ja Cristugagu rü Tupana nüxŭ nixu na napexewa imexŭ rü nüxna ínguxŭxŭ i guxŭma i tórü pecadugü. ¹⁷Rü guxŭma i duüxŭgü najue jerü wüxitama ga jatü ga Adáú rü pecadu naxü. Notürü tama jemaãcü tamaã nanaxü ga Tupana, jerü ga nüma rü poraãcü tamaã namecüma rü tüxŭ nangetanüãcüma tüxŭ narüngŭxëe. Rü ngēmacax i nhuxma rü guxŭma i ngēma duüxŭgü i Tupana nüxŭ ixuxŭ na napexewa jamexŭ, rü nümatama ja Tupana rü Nane ja Ngechuchu ja Cristugagu nanamaxëxëe na namaã wüxigu äxgacügü jixŭgŭxŭcax. ¹⁸Rü jema Adáúärü chixexŭ rü pocuwa nanagagü ga guxŭma ga duüxŭgü. Notürü jema mexŭ ga Ngechuchu ja Cristu üxŭ rü pecaduwa ínananguxŭxëe i guxŭma i duüxŭgü i jaxögŭxŭ, rü nüxna nanaxã i maxŭ i taguma gúxŭ. ¹⁹Rü guma nüxŭraücü ga jatü ga Adáú rü tama Tupanaga naxŭnú. Rü jemaãcü

wüxitama ga jatügagu rü muxŭma ga duüxŭgü rü nipecaduãx. Notürü ínangu ga guma jatü ga Ngechuchu, rü meã Tupanaga naxŭnú. Rü gumagagu rü muxŭma i duüxŭgü rü tá nime i Tupanapexewa. ²⁰Rü Tupana rü Muísena nanaxã ga norü mugü na duüxŭgŭxŭ nüxŭ nacuaqxëxŭcax na nhuxãcü poraãcü pecadu naxŭgŭxŭ. Notürü jexguma jexeraãcü pecadu naxŭgüga ga duüxŭgü, rü jexeraãcü Tupanaãxŭ nangechaütümüügü. ²¹Rü nhuxma woo pecadugagu na ijuexŭ, notürü Tupanaãxŭ tangechaütümüügü i guxŭguma. Rü ngēmaãcü pecaduwa tüxŭ ínanguxŭxëe na napexewa imexŭcax rü tórü Cori ja Ngechuchu ja Cristugagu tüxŭ nangëxmaxŭcax i maxŭ i taguma gúxŭ.

**Nhuxma rü tama pecadu
ixŭgŭxŭcax nixŭ i imaxëxŭ, notürü
Cristucax nixŭ i imaxëxŭ**

6 ¹Rü nhuxma na Tupanaãxŭ ingechaütümüügŭxŭ, ¿rü nhuxãcü tá imaxëxŭ i nhuxmax? ¿Rü pexcax rü namexŭ na pecadu ixŭgŭiechaxŭ na jexeraãcü Tupanaãxŭ ingechaütümüügŭxŭcax? ²Rü dücax, tama ngēmaãcü nixŭ. Erü nhuxma pecaduchaxwa rü nhama ijuexŭrüü tixŭgü, erü marü tama naga taxŭnüe. Rü ngēmacax tama name i jeücürü pecadu taxŭgŭiecha. ³¿Tama exna nüxŭ pecuax na tacücax jŭixŭ na íbaiüxŭ? Rü ítabaiü na ngēmaãcü duüxŭgŭxŭ nawéxŭcax na aixcuma Ngechuchu ja Cristuarü duüxŭgü na ixŭgŭxŭ. Rü jexguma íbaiügu, rü nüma najuxŭrüü jexma naju ga tacüma ga nuxcumaüxŭ. ⁴Rü

jexguma íbaiũgu, rü Cristu juxũrũũ
 jexma naju ga tacũma ga nuxcũmaũxũ,
 rü Cristu itáxũrũũ inatax ga jema
 tacũma ga nuxcũmaũxũ. Rü jemaãcü
 naxüpetü na wena imaxẽxũcax rü tüxũ
 nangẽxmaxũcax i maxũ i
 ngexwacaxũxũ, jexgumarũũ ga
 Ngechuchu na juwa írudaxũ rü wena
 namaxũxũ ga jexguma Nanatü ga
 Tupana norü poramaã ínadaxẽegu. ⁵Rü
 nhuxma na Cristumaã wüxigu najuxũ ga
 tacũma ga nuxcũmaũxũ, rü nüxũ tacuax
 na aixcuma Cristumaã tüxũ
 nangẽxmaxũ i maxũ i ngexwacaxũxũ.
⁶Rü nüxũ tacuax rü jema tórü maxũ ga
 nuxcũmaũxũ rü Cristumaã wüxigu
 curuchagu naju na jexma janaxoxũcax
 ga jema tacũma ga chixexũ. Rü nhuxma
 rü tama pecadutũüwa tangẽxmagü, rü
 ngẽmacax marü tama naga taxĩnüẽ.
⁷Erü jíxema júxe rü marü tama
 pecadutũüwa tangẽxma na jeũcüri
 pecadu taxüechaxũcax. ⁸Rü nhuxma na
 Cristumaã najuxũ ga tórü maxũ ga
 nuxcũmaũxũ, rü nüxũ tacuax na
 Cristurũũ tüxũ nangẽxmaxũ i maxũ i
 ngexwacaxũxũ. ⁹Rü nüxũ tacuax rü
 nhuxma na juwa ínadaxũ ja Cristu, rü
 tagutãma wena naju. Jerü nüma rü
 marü juxũ narüjexera. ¹⁰Rü jexguma
 najuxgu ga Cristu rü pecaducax nixĩ ga
 najuxũ, rü noxtacũma jexma wüxicana
 ningutanü ga guxũma ga duũxũgüari
 pecadugü. Notürü nhuxma na
 namaxũxũ, rü Tupanacax nixĩ i
 namaxũxũ na Tupanaãrü ngúchaũ
 naxũxũcax. ¹¹Rü ngẽxgumarũũ ta i
 pema rü name nixĩ i pegügu perüxĩnüẽ
 na marü pejuexũ pecaduchaxwa rü
 Tupanacax pemaxẽxũ, erü Ngechuchu ja

Cristuarü duũxũgü peixĩgü. ¹²Rü
 ngẽmacax rü tama name i pecadutũüwa
 pegü pengẽxmagüxẽẽ na pemaã
 inacuáxũcax. Rü tama name i
 penaxüchica i pecadu na pexeneãrü
 ngúchaũgü i chixexũ pexũ
 naxũxẽxũcax. ¹³Rü tama name i
 pecaduna penaxãgü i pexene na
 ngẽmamaã chixexũ pexügüxũcax. Rü
 name nixĩ i Tupanana pegü pexãgü, erü
 nhama duũxũgü i juexũ rü wena
 maxẽxũrũũ peixĩgü. Rü ngẽmacax name
 nixĩ i Tupanana penaxãgü i pexene na
 ngẽmamaã mexũ pexügüxũcax. ¹⁴Rü
 nhuxma rü tãuxũtãma pecadutũüwa
 pengẽxmagü na pemaã inacuáxũcax. Rü
 jexguma jema mugü ga Muísé
 ümatüxũwe perüxĩngu, rü pemaã
 inacuax ga pecadu. Notürü i nhuxma rü
 Cristugagu Tupana pemaã namecüma,
 rü nüma nixĩ i pemaã inacuáxũ i
 nhuxmax.

**Ngẽxguma wüxi i corimexëwa
 jigü ingẽxmagüxẽẽgu,
 rü ngẽmaga nixĩ i ixĩnüexũ**

¹⁵Rü nhuxma na tama jema Muísé
 ümatüxũ ga mugütũüwa ingẽxmagüxũ,
 rü nhuxma na Tupana rü Cristugagu
 tamaã mecümaxũ, ¿rü nhuxãcü tá
 imaxẽxũ? ¿Rü pexcax namexũ na
 jeũcüri pecadu ixügüechaxũ? Rü dücax,
 tama name na ngẽmaãcü imaxẽxũ. ¹⁶Rü
 pema nüxũ pecuax rü ngẽxguma wüxi i
 corimexëwa pegü pengẽxmagüxẽẽgu na
 naga pexĩnüexũcax rü ngẽma tá nixĩ i
 perü cori ixĩxũ, rü pema rü norü
 duũxũgü tá peixĩgü i ngẽma cori i naga
 pexĩnüexũ. Rü nhuxma rü pema tá nüxũ
 pedaugü ngoxi ngẽxũrüxũ perü me jixĩ

na ngēmaga pexīnūēxīcax. Rū ngēxguma pecadu i juwa tūxū gagūxū perū me jixīgu, rū ngēma tá nixī i pemaā icuāxū. Rū ngēxguma perū me jixīgu na Tupanaga na pexīnūēxū, rū jimaga tá pexīnūē na napexewa pemexūcax. ¹⁷Notürü Tupanana moxē chaxā, jerū woo pecaduga na pexīnūēchirēxū, notürü i nhuxma rū aixcuma naga pexīnūē i ngēma nguxēetae i marū pejaxuxū i Cristuchiga. ¹⁸Rū nhuxma rū Tupanaārū duūxūgū peixīgū erū nūma rū chixexūna pexū ínguxūxēē na tama pecadu pexīgüechaxūcax. Rū ngēmaācū pexū narūngūxēē na napexewa pemexūcax rū meā naxcax pemaxēxūcax. ¹⁹Rū nhama i naānecūāx i duūxūgūmaā chidexarūū nixī i tauxchaxū i oremaā pemaā chidexaxū i nhuxmax, erū pema rū woetama taguma nūxū pexīnūē i nhaā ore, rū ngürüāchi tāxūtáma nūxū pecuax i tacūchiga na jīxū i ngēma pemaā nūxū chixuxū. Rū dūcax, rū nuxcūma rū ipenaxā ga pexene na namaā penaxūgūxūcax ga nagúxūraūxū ga chixexū. Notürü i nhuxma rū name nixī i Tupanana pegū pexā na aixcuma napexewa pexūünegūxūcax rū naxcaxicatama pemaxēxūcax. ²⁰Rū jexguma pecadutūūwa pejexmagūgu, rū taxucürüwama Tupanapexewa mexū pexūgū ga jexguma. ²¹¿Notürü tacūwa pexū namexū ga jema chixexū i nhuxma rū wūxi i āne pexna āxū? Jerū jema chixexū rū juwamare pexū nagagū, rū tama i maxūwa. ²²Notürü marū tama pecadutūūwa pengēxmagū i nhuxmax, erū marū nūxna ípengūū rū marū

Tupanaārū duūxūgū peixīgū. Rū ngēma waxi nixī i poraācū pexū mexū erū ngēmagagu penajaxu i maxū i Tupanapexewa ünexū rū ngēmawena tá penajaxu i maxū i taguma gúxū. ²³Rū ngēma natanū na pecadu íxūxū, rū ju nixī. Notürü jíxema tórū Cori ja Ngechuchuaxū jaxōgūxe, rū Tupana tūxna nanaxāmare i maxū i taguma gúxū.

Wūxi i ngecū rū ngēxguma najutegu rū marū tama ngitemexēwa ingēxma. Rū nhuxma na taxcax najuxū ja Cristu, rū marū tama jema Muísé úmatūxū ga mugütūūwa tangēxmagū

7 ¹Pa Chaueneēgūx, rū pema na nagu pexīxū i ngēma mugū, rū nūxū pecuax rū ngēxguma tamaxūguxicatama nixī na ngēma mugütūūwa tangēxmaxū ja wūxichīgū ja duūxē. ²Rū dūcax, rū wūxi i ngecū i ātecū rū ngitemexēwa ingēxma ega namaxjane ja ngīte, erū ngēma nhanagürü i ore i mugū. Notürü ngēxguma najuxgu ja ngīte, rū marū tama ngitemexēwa ingēxma. Rū jema mugū ga ngitemexēwa ngīxū jexmaxēēxū ga noxri rū marū tama ngīmaā inacua. ³Rū ngēmaācū i ngēxguma namaxjane ja ngīte rū to i jatūmaā inapexgu, rū pecadu íxū. Notürü ngēxguma marū najuxgu ja ngīte, rū marū nūxna ínguxuchi i ngēma mugū ga ngitemexēwa ngīxū jexmaxēēxū ga noxrix. Rū ngēxguma wenaxārū naxātegu rū taxuūma i chixexū íxū. ⁴Rū ngēxgumarūū ta i pemax, Pa Chaueneēgūx, rū marū tama jema Muísé úmatūxū ga mugütūūwa

pengēxmagü jerü nüma ga Cristu rü pexçax naju. Rü ngēmacax i nhuxma rü Cristu ga juwa írüdacüarü peixígü. Rü ngēmaäcü nanaxü ja Tupana na naxçax imaxēxüçax, rü norü ngúchaü ixügüxüçax. ⁵Rü jexguma nuxcümaüxü ga tacümawe rüxixgu rü poraäcü tanaxü ga taxüneaü ngúchaügü woo jema mugü tüxna na nachuxuxü ga jema. Notürü jexguma nüxü icuaxgu na nachuxuxü ga jema pecadu ga ixüxü, rü jexeraäcü tanaxüxchaü. Rü jemaäcü ga jema tórü pecadugü rü juwa tüxü nagagü. ⁶Notürü i nhuxma rü marü tama ngēma mugütüüwa tangēxmagü, erü Tupana rü marü nüxna tüxü íngangüxēē. Rü ngēmacax i nhuxma rü nhama duüxügü i ijuexürüü tixígü i napexewa i ngēma mugü, erü marü tama tamaã inacuax. Rü ngēmacax tama nagu taxí i ngēma nuxcüma ümatüxü ga mugü, erü marü nüxna ítangüxü na Tupanaärü ngúchaü ixügüxüçax rü naxçax na imaxēxüçax namaã i tórü maxü i ngexwacaxüxü i Naãe i Üünexü tüxna äxü.

**Ngēma pecadu i chawa ngēxmaxü
rü chamaã inacuax**

⁷¿Rü nhuxü nhagüxü tá i nhuxmax?
¿Rü pexçax rü jema mugü jíixü ga tüxü pecaduäxēxü? ¿Rü dücax, tama name i ngēmaäcü nagu tarüxínüē! Notürü jexguma chi jema mugü rü tama choxü nüxü nacuaxēēgu, rü tau chima nüxü chacuax na pecadutüüwa chajexmaxü. Rü dücax, rü jexguma chi jema mugü rü tau chima choxü nüxü cuaxēēgu na wüxi i pecadu jíixü na toguaxärü ngēmaxüçax chixauxächixü, rü tau

chima nüxü chacuax na pecadu jíixü i ngēma. ⁸Notürü jexguma jema mugü choxü nguxēēgu na nachixexü na toguaxärü ngēmaxü choxü ngúchaüxü, rü jexguma ga pecadu rü najoxniē na jexeraäcü choxü na nangúchaüxēēaxü. Rü ngēmaäcü nüxü tadau rü ngēxguma chi natauxgu i ngēma mugü, rü tau chima nüxü tacuaxgü na nhuxäcü wüxi i chixexüchixü na jíixü i ngēma pecadu. ⁹⁻¹⁰Rü noxri taüta jema mugüxü chacuaxgu, rü chama nagu charüxínügu rü chame. Notürü jexguma jema mugüxü chacuaxgu, rü nüxü chicuaxächi na chixexü chaxüxü rü ngēma chixexüçax rü tá na chajuxü. Rü jemaäcü ga jema mugü ga Tupana Muíséna äxü na duüxügüxü namaxēxēxüçax, rü choxü najuxēēäma. ¹¹Rü nüma ga pecadu rü najoxniē namaã ga jema mugü. Jerü jexguma jema mugü choxü nguxēēgu na nhuxäcü nachixexü ga jema pecadu, rü jexeraäcü choxü nangúchaü ga jema pecadu. Rü jemaäcü ga jema pecadu rü choxü nawomüxēē rü najoxniē namaã ga jema mugü rü juwa choxü naga. ¹²Notürü jema mugü rü aixcuma naxüüne i Tupanapexewa. Rü guxüma i ngēma Tupana tamaã nüxü ixüxü rü naxüüne rü aixcuma name rü tüxü narüngüxēē. ¹³¿Notürü nhuxäcü nixí i ngēma i nhuxmax? ¿Exna pexçax rü jema mugü jíixü ga juwa choxü gaxü? Rü dücax, rü tama ngēmaäcü nixí. Erü ngēma pecadu nixí i Tupanaärü mugümaã joxniēxü na juwa choxü nagaxüçax. Rü ngēmaäcü nüxü tacuax na nhuxäcü poraäcü nachixexü i pecadu. Rü jexguma jema mugü choxü nguxēēgu na nhuxäcü

poraãcü nachixexũ ga jema pecadu, rü jexeraãcü choxũ nangúchaũ ga jema chixexũ rü jexeraãcü chanaxüama ga pecadu. ¹⁴Nüxũ tacuax i ngẽma mugü rü Tupanaãe i Üünexüwa ne naxü. Notürü chama rü duũxũmare chixĩ, rü ngẽmacax nixĩ i chamaã icuáxũ i ngẽma pecadu i chaxüxũ. ¹⁵Rü tama nüxũ chacuax na tacü choxũ üpetüxũ erü tama chanaxü i ngẽma mexũ i chanaxwaxexũ na chaxüxũ, notürü ngẽma chixexũ i tama chanaxwaxexũ na chaxüxũ rü ngẽmaãma nixĩ i chaxüxũ. ¹⁶Notürü i nhuxma na chanaxüxũ i ngẽma tama chanaxwaxechirẽxũ na chaxüxũ, rü ngẽmawa nüxũ chicuaxãchi na namexũ i ngẽma mugü. ¹⁷Rü ngẽmacax i nhuxma rü tama chauechama nixĩ i chanaxüxũ i ngẽma chixexũ. Notürü ngẽma pecadu i chawa ngẽmaxũ nixĩ i chamaã icuáxũ, rü ngẽma nixĩ i chixexũ choxũ üxẽexũ. ¹⁸Rü chama nüxũ chacuax rü wüxi i pecaduáxũ i duũxũmare chixĩ, rü ngẽmacax chawa rü nataxuma i tacü i mexũ. Erü woo chanaxwaxe na mexũ chaxüxũ, notürü tama chamaã nanguxũ na chanaxüxũ. ¹⁹Erü ngẽma mexũ i chanaxwaxexũ na chaxüxũ, rü tama chanaxü. Notürü chanaxüama i ngẽma chixexũ i tama chanaxwaxexũ na chanaxüxũ. ²⁰Rü ngẽxguma chi chanaxüamagu i ngẽma chixexũ i tama chanaxwaxexũ na chaxüxũ, rü meãma nangox na tama chauechama chanaxüxũ. Notürü ngẽma pecadu i chawa ngẽmaxũ nixĩ i chamaã icuáxũ rü chixexũ choxũ üxẽexũ. ²¹Rü ngẽmaãcü nüxũ chadau i nhuxãcü na chiixũ. Rü ngẽxguma mexũ

chaxüxchaũgu rü choxũ natauxcha na chixexũãma chaxüxũ. ²²Chama rü chauãewa rü chorü me nixĩ i Tupanaãrü mugü, rü naga chaxĩnúchaũ. ²³Notürü nhaã chaxune i nhama i naãnecũãx ixĩxüwa, rü nangẽxma i tacü i tama naxüxchaũxũ i ngẽma chauãe naxwaxexũ. Rü ngẽma pecadu i chawa ngẽmaxũ nixĩ i chamaã icuáxũ rü chixexũ choxũ üxẽexũ. ²⁴⁻²⁵Rü ngẽmaãcü i chama rü chauãewa chajanguxẽẽchaũ i Tupanaãrü mugü, notürü nhama i naãnecũãx i chaxune rü nanaxüxchaũ i ngẽma nanaxwaxexũ i pecadu. Rü taxuũcaxma chataãe i chamax. ¿Rü texe tá nüxna choxũ ítanguxuchixẽe i nhaã pecadu i chawa ngẽmaxũ rü juwa choxũ gaxchaũxũ? Rü Tupanana moxẽ chaxã erü tórü Cori ja Ngechuchu ja Cristu rü tá choxũ nüxna ínanguxuchixẽe.

**Nhuxãcü Tupanaãe i Üünexü
naxwaxexũãcüma meã tamaxẽ**

8 ¹Rü nhuxma ja Tupana rü marü taxuũcaxma nanapocue i ngẽma duũxũgü i Ngechuchu ja Cristuarü duũxũgü ixĩgüxũ. ²Erü Tupanaãe i Üünexũ i Ngechuchu ja Cristugagu tüxũ maxẽxẽexũ, rü nüxna tüxũ ínanguxüxẽe i pecadu na tama juwa tüxũ nagagüxũcax. ³Rü jema taxüneãrü ngúchaũgü rü marü nüxũ narüjexera ga jema mugü ga Muísẽ umatüxũ. Rü jemacax ga jema mugü rü taxucürüwa mexũ tüxũ naxüxẽe. Notürü nüma ga Tupana rü marü nanaxü ga jema taxucürüwa naxüxũ ga jema mugü. Jerü ga Tupana rü nhama ga naãnewa nanamu ga Nanexũchi. Rü woo taxüne i

pecaduáxũrũ nixĩ ga naxũne, notũrũ nũma ga Nane rũ taguma napedaduáx. Rũ nũma ga Nane rũ tórũ pecaducax naju, rũ jemaãcũ inajanaxoxẽẽ ga norũ pora ga jema pecadu ga taxũnewa jexmaxũ. ⁴Rũ jemaãcũ nanaxũ ga Tupana na tũxũ na natauxchaxũcax na janguxẽẽxũ i ngẽma tũxũ namuxũ i ngẽma mugũ. Erũ nhuxma rũ tama nhama i taxũne naxwaxexũãcũma tamaxẽ, notũrũ Tupanaãẽ i Üünexũ naxwaxexũãcũma nixĩ i imaxẽxũ. ⁵Rũ jĩxema tũmaxũne naxwaxexũãcũma maxẽxẽ, rũ naxcax tadaugũ i ngẽma nhama i naãnecũãx naxwaxexũ. Notũrũ jĩxema Tupanaãẽ i Üünexũ naxwaxexũãcũma maxẽxẽ, rũ ngẽma Tupanaãẽ i Üünexũ naxwaxexũ nixĩ i naxcax tadaugũxũ. ⁶Rũ jĩxema Tupanaãẽ i Üünexũ naxwaxexũcax daugũxe rũ tataãẽgũ, rũ tá tũxũ nangẽxma i tũmaãrũ maxũ i taguma gũxũ. Notũrũ jĩxema tũmaxũne naxwaxexũcax daugũxe rũ ngẽma rũ tá juwa tũxũ nagagũ. ⁷Rũ jĩxema tũmaxũne naxwaxexũcax daugũxe rũ Tupanaãrũ uwanũ tixĩgũ. Rũ tama Tupanaga taxĩnũechaũ erũ taxucĩrũwama naga taxĩnũ. ⁸Rũ ngẽmacax ja jĩxema tũmaxũneãrũ ngũchaũwe rũxĩxẽ, rũ taxucĩrũwa Tupanaãrũ ngũchaũ taxũgũ. ⁹Notũrũ ngẽxguma aixcuma pewa nangẽxmagu i Tupanaãẽ i Üünexũ rũ tama pexeneãrũ ngũchaũ pexũ, notũrũ Naãẽ i Üünexũãrũ ngũchaũ nixĩ i pexũxũ. Rũ jĩxema tama tũxũ nangẽxmaxẽ i Tupanaãẽ i Üünexũ i Cristu tũxna ãxũ, rũ tama Cristuarũ duũxũ tixĩ. ¹⁰Notũrũ ngẽxguma pewa namaxũgu ja Cristu, rũ

woo pecadugagu tá najuxgu i pexene, notũrũ peãẽ rũ namaxũ, erũ Tupana pexũ nadau na pemexũ. ¹¹Rũ ngẽxguma pewa namaxũgu i Naãẽ ja jima Tupana ga Ngechuchu ja Cristuxũ írũdaxẽẽcũ, rũ nũmatátama ja jima Cristuxũ írũdaxẽẽcũ tá wena nanamaxẽẽ i pexene i juxwaxexũ, rũ Naãẽ i Üünexũ i pewa maxũxũ tá nixĩ i naxũxũ i ngẽma. ¹²Rũ ngẽmacax, Pa Chaueneẽgũx, rũ tanaxwaxe i Tupanaãrũ ngũchaũ taxũ, rũ tama tanaxwaxe i taxũne i pecaduáxũãrũ ngũchaũ taxũ. ¹³Erũ ngẽxguma chi pexeneãrũ ngũchaũ pexũxgu rũ tá ipejarũtauxe. Notũrũ ngẽxguma Tupanaãẽ i Üünexũãrũ ngũxẽẽmaã ipejanaxoxẽẽgu i ngẽma pexene ùxchaũxũ, rũ aixcuma tá pexũ nangẽxma i maxũ i taguma gũxũ. ¹⁴Erũ guxãma ja jĩxema Tupanaãẽ i Üünexũ tũmamaã icuáxe, rũ aixcuma Tupanaxãcũgũ tixĩgũ. ¹⁵Noxri rũ Tupanaxũ pemuũẽ ga jexguma pepecaduáxgũgu, notũrũ i nhuxma rũ Tupanaxãcũgũ peixĩgũ erũ Naãẽ i Üünexũ rũ naxãcũgũxũ pexũ nixĩgũxẽ. Rũ Naãẽ i Üünexũ i pema pejaxuxũ rũ pemaã namecũma rũ tama pocumaã pexũ namuũxẽẽ. Rũ ngẽmatama Naãẽ i Üünexũ nixĩ i tũxũ rũngũxẽẽxũ na tama imuũẽxũcax na Tupanana ingaicamagũxũ rũ:

“Pa Tonatũx”, nhagũxũ nũxũ. ¹⁶Rũ ngẽmatama Naãẽ i Üünexũ nixĩ i aixcuma tũxũ nũxũ cuaxẽẽxũ na Tupanaxãcũgũ na ixĩgũxũ. ¹⁷Rũ nhuxma na Tupanaxãcũgũ ixĩgũxũ i jixema, rũ nũxũ tacuax rũ dauxũgũxũ i naãnewa tá tanajaxu i ngẽma mexũgũ i Tupana tũxna ãxchaũxũ. Rũ ngẽmaãcũ

Cristumaã tá tūxŭ́ nangēxma i tachica i mexŭ́ i Tupanaxŭ́tawā, erŭ́ Cristurŭ́́ ngúxŭ́́ tingegŭ́ na jixcŭ́ra wŭ́xigu namaã mexŭ́wa ingēxmagŭ́xŭ́cax.

**Ngēma mexŭ́ i jixcŭ́ra
tá nŭ́xŭ́ idauxŭ́chiga**

¹⁸Rŭ́ dŭ́cax, rŭ́ chama nagu charŭ́xŭ́nŭ́ rŭ́ ngēma ngúxŭ́ i nhŭ́xma nhama i naãnewa ingegŭ́xŭ́, rŭ́ taxuŭ́ma nixŭ́ i ngēxguma nagu nanguxgu i ngēma mexŭ́ i jixcŭ́ra tá nŭ́xŭ́ idauxŭ́ i ngēxguma Cristumaã ingēxmagŭ́gu i dauxŭ́guxŭ́ i naãnewa. ¹⁹Rŭ́ nhŭ́xma rŭ́ guxŭ́ma i ŭ́acŭ́ i Tupana ŭ́xŭ́ rŭ́ taxŭ́ i norŭ́ ngúchaŭ́maã ínananguxēēgŭ́ i ngēma ngunexŭ́ i nagu tá nataeguxŭ́ ja Cristu na Tupana guxŭ́pexewa naxácŭ́gŭ́xŭ́ iwéxŭ́. ²⁰Rŭ́ nŭ́xŭ́ tacuaxgŭ́ rŭ́ jexguma pecadu naxŭ́xgu ga guma nŭ́xŭ́raŭ́cŭ́ ga jatŭ́ rŭ́ jexguma nixŭ́ ga nachixexŭ́ ga guxŭ́ma ga jema Tupana ŭ́xŭ́. Rŭ́ tama jema Tupana ŭ́xŭ́rŭ́ ngúchaŭ́ nixŭ́ ga jema, notŭ́rŭ́ jemaácŭ́ nŭ́xŭ́ naxŭ́petŭ́ jerŭ́ ga Tupana rŭ́ jemaácŭ́ inaxuneta ga jexguma pecadu naxŭ́xgu ga guma jatŭ́. Notŭ́rŭ́ i nhŭ́xma rŭ́ guxŭ́ma ga jema Tupana ŭ́xŭ́ rŭ́ ínananguxēē na ngēma chixexŭ́wa ínanguxŭ́xŭ́cax. ²¹Erŭ́ ngēma ngunexŭ́ i Tupana tá nagu nadexŭ́ i naxácŭ́gŭ́ na naxŭ́tawā nangēxmagŭ́xŭ́cax, rŭ́ ngēxguma tá ta nixŭ́ i chixexŭ́wa ínanguxŭ́xēēxŭ́ i guxŭ́ma ga jema nŭ́matama naxŭ́xŭ́. Rŭ́ ngēmaácŭ́ wenaxărŭ́ noxrŭ́rŭ́́ tá name i guxŭ́ma. ²²Rŭ́ nŭ́xŭ́ tacuax rŭ́ guxŭ́ma ga jema Tupana ŭ́xŭ́, rŭ́ noxritama chixexŭ́ nŭ́xŭ́ ŭ́petŭ́gu rŭ́ poraácŭ́xŭ́chima nanaxwaxeecha na wenaxărŭ́ noxrŭ́rŭ́́

namexŭ́. ²³Rŭ́ tama ngēmaxŭ́catama nixŭ́ i poraácŭ́ nanaxwaxegŭ́xŭ́ na wenaxărŭ́ noxrŭ́rŭ́́ namexŭ́. Notŭ́rŭ́ jixema na jaxŭ́gŭ́xŭ́ rŭ́ ta tanaxwaxe na ínanguxŭ́ ja Tanatŭ́ na naxácŭ́gŭ́xŭ́ tŭ́xŭ́ na nadexŭ́cax rŭ́ ngexwacaxŭ́xŭ́ i taxŭ́negŭ́ tŭ́xna naxáxŭ́cax. Rŭ́ woo tŭ́xŭ́ na nangēxmaxŭ́ i Tupanaãē i Ŭ́nexŭ́ i tŭ́xŭ́ nŭ́xŭ́ cuaxēēxŭ́ na nhuxácŭ́ tá jŭ́xŭ́ i dauxŭ́guxŭ́ i naãnewa, notŭ́rŭ́ tanaxwaxe na paxa ngēmaxŭ́chi ingugŭ́xŭ́. ²⁴Cristu tŭ́xna nanaxã i maxŭ́ i taguma gúxŭ́, notŭ́rŭ́ ítananguxēēgŭ́mare na naxŭ́tawā ingugŭ́xŭ́ na najauxgŭ́xŭ́cax i ngēma maxŭ́. Notŭ́rŭ́ nŭ́xŭ́ tacuax rŭ́ ngēxguma chi marŭ́ nŭ́xŭ́ idaugŭ́gu i ngēma írŭ́nguxēēgŭ́xŭ́, rŭ́ taxuŭ́caxma tŭ́xcŭ́ŭ́ ítananguxēēgŭ́. Erŭ́ ngēma marŭ́ nŭ́xŭ́ idauxŭ́, rŭ́ taxuŭ́caxma ítananguxēē. ²⁵Notŭ́rŭ́ ngēxguma taŭ́ta nŭ́xŭ́ idaugŭ́gu i ngēma írŭ́nguxēēgŭ́xŭ́, rŭ́ tanaxwaxe i meã ítananguxēēgŭ́echa nhŭ́xmatáta nŭ́xŭ́ idaugŭ́. Rŭ́ ngēmaácŭ́ nixŭ́ i Cristuxŭ́ írŭ́nguxēēgŭ́xŭ́. ²⁶Rŭ́ Tupanaãē rŭ́ tŭ́xŭ́ narŭ́ngŭ́xēē ta na iporaexŭ́cax i ngēxguma guxchaxŭ́gŭ́ tŭ́xŭ́ ŭ́petŭ́gu. Rŭ́ jixema rŭ́ tama nŭ́xŭ́ tacuax na nhuxácŭ́ Tupanamaã idexagŭ́xŭ́ rŭ́ ŭ́acŭ́cax íjumuxēgŭ́xŭ́. Notŭ́rŭ́ Naãē i Ŭ́nexŭ́ rŭ́ naxauxácŭ́ma ore i tama nŭ́xŭ́ icuáxŭ́maã Tupanamaã nidexa rŭ́ taxcax najumuxē. ²⁷Rŭ́ Tupana ja meã tŭ́xŭ́ cuácŭ́ rŭ́ nŭ́xŭ́ nacuax na nhuxŭ́ nhaxŭ́chiga jŭ́xŭ́ i ngēma Naãē i Ŭ́nexŭ́ nŭ́xŭ́ ixuxŭ́. Erŭ́ ngēma Naãē i Ŭ́nexŭ́ rŭ́ Tupana naxwaxexŭ́ácŭ́ma Tupanaxŭ́ nacaaxŭ́ tŭ́macax ja jŭ́xema Tupanaărŭ́ duŭ́xŭ́gŭ́ ixŭ́gŭ́xe.

**Cristu rū tūxū naporaexēēama na
taxuūma i guxchaxūgū tūxū
narūjexeraxūcax**

²⁸Rū nūxū tacuax rū tūmaārū
mexūcax nixī i Tupana ínanguxēēxū i
guxūma i ngēma tūxū ūpetūxū ja jíxema
nūxū ngechaūgūxe ga nūma
nanaxwaxexūācūma tūxū jadexechixe.
²⁹Rū woetama nuxcūmama ga Tupana
rū marū tūxū nacuax na texégū tá
tixīgūxū ja jíxema noxrū ixīgūxe. Rū
noxritama naāne ixūgūgumama tūxū
nidexechi na Nanerūū timexū i
napexewa, rū jima Nane rū tūmamaā
inacuáxūcax ja guxāma ja jíxema
naēneēgū ixīgūxe. ³⁰Rū guxema noxri
naāne ixūgūgumama Tupana tūxū
idexechixe, rū tūmacax naca na noxri
tixīgūxūcax. Rū guxema tūmacax
naçaxe, rū nūgūcax tūxū nimexēēgū. Rū
guxema nūgūcax tūxū jamexēēgūxe, rū
daxūwa tá tūxū nagagū na
guxūgutāma naxūtawa
tangēxmagūxūcax. ³¹¿Rū nhuxū
nhagūxū tá i nhuxma i ngēmachiga? Rū
ngēxguma Tupana taétūwa chogūgu,
¿rū texé tá tūxū rūjexeraxū? ³²Jerū
nūma ga Tupana rū tama tūxna
najanuxū ga Nanexūchi. Notūrū taxcax
inanamu ga Nane na taxcax najuxūcax i
guxāma i jixema. Rū nhuxma na
jemaācū taxcax inamuāxū ga Nane, ¿rū
taux exna tūxna naxāāxū i guxūma i
çacū i inaxwaxexū na naxcax
imaxēxūcax? ³³Rū Tupana tūxū
nidexechi rū tūxū nixu na napexewa
imexū. Rū ngēmacax ¿rū texé tá
napexewa tūxū tixugū na ichixexū? Erū
Tupanatama nixī ja tūxū ixucū na tūxū

nataxuūma i chixexū. ³⁴¿Rū texé tá
pocuwa tūxū tamugū i nhuxmax?
¿Pexcax rū Cristu tá jīixū? Dūcax,
taxucūrūwama ngēmaācū nixī jerū
Cristu nixī ga taxcax jucū na tūxū
namaxēxēxūcax. Rū tama ngēxīcatama
taxcax naxū, notūrū wenaxārū inarūda.
Rū nhuxma rū Tupanaxūtawa
nangēxma rū ngēma āēxgacū nixī. Rū
ngēma taétūwa nachogū rū Tupanaxū
taxcax nacaaxū. ³⁵¿Rū nhuxma rū çacū
tá Cristuna tūxū ixīgachixēēxū na tama
tūxū nangechaūxūcax? Rū woo ngūxū
ingegūgu, rū exna guxchaxūgū tūxū
ngēxmagu, rū exna duūxūgū Cristugagu
tachi aiegu, rū exna itaijaegu, rū exna
ingexchirugūgu, rū exna āūcūmaxūwa
ingēxmagūgu, rū exna duūxūgū tūxū
daixchaūgu, notūrū woo guxūma i
ngēma tūxū ūpetūgu, notūrū ja Cristu rū
tāxūūtāma nūxū narūchau na tūxū
nangechaūxū. ³⁶Notūrū guxūguma
āūcūmaxūwa tangēxmagū, ngēma
Tupanaārū ore i ūmatūxū nūxū
ixuxūrū. Erū ngēma ore rū nhanagūrū:
“Rū cugagu duūxūgū toxū
nadaixchaū rū duūxūgūpexewa
rū nhama carnerugū i daiwa
ixūrū tixīgū”,
nhanagūrū i ngēma ore. ³⁷Notūrū woo
guxūma i ngēma tūxū na ngupetūxū, rū
Ngechuchu ja Cristu ja tūxū ngechaūcū,
rū tūxū naporaexēēama na taxuūma i
guxchaxūgū tūxū narūjexeraxūcax, rū
bai i çacū. ³⁸⁻³⁹Rū ngēmacax aixcuma
chajaxō na taxucūrūwama çacū
Tupanana tūxū ixīgachixēēxū na
ngēmaācū tama tūxū nangechaūxūcax.
Rū woo ijuxgu rū woo imaxēgu, notūrū
Tupana tá tūxū nangechaūēcha. Rū

taxucüriwama Tupanana tüxĩ
 nixĩgachixēē i tacü i norü orearü
 ngeruũgü, rü ɛxna tacü rü ngoxogü rü
 ɛxna tacü i to i poraxũ. Rũ bai i tacü i
 nhuxma tüxũ üpetüxũ, rü bai i tacü i
 jixcüra tá ngëxmaxũ, rü bai i tacü i
 dauxüwa ngëxmaxũ, rü bai i tacü i
 naãnetüüwa ngëxmaxũ, rü bai i tacü i to
 i Tupana üxũ, rü taxucüriwama
 Tupanana tüxũ nixĩgachixēē na tama
 tüxũ nangechaũxüçax. Rũ ngëmaãcü
 nixĩ i tüxũ nangechaũxü ja Tupana
 nagagu ja tórü Cori ja Ngechuchu ja
 Cristu.

**Tupana rü najadexechi i Judéugü
 na norü duũxügü na jixĩgüxüçax**

9 ¹Dücax, Pa Chaueneëgüx, rü
 pemaã tá nüxũ chixu i wüxi i ore.
 Rũ ngëma ore i pemaã tá nüxũ chixuxũ
 rü aixcuma nixĩ erü Cristuarü duũxũ
 chixĩ. Rũ tama chidora. Rũ
 chauãëwatama nüxũ chacuax na
 aixcuma na jixũ i ngëma ore erü
 Tupanaãē i Üünexũ nixĩ i chauãëmaã
 icuáxũ. ²Rũ poraãcü changechaũ, rü
 choxũ nangúecha i chauãëwa, erü tama
 najaxögü i chautanüxügü i Judéugü.
³Rũ aixcuma pemaã nüxũ chixu rü
 guxüguma ngëma chautanüxügu
 charüxinü, rü poraãcü chanaxwaxe na
 Cristuaxũ jaxögüaxũ. Rũ chama rü
 aixcuma íchamemare na pocuwa choxũ
 namuxũ ja Tupana rü Cristuna choxũ
 jaxügachixēëxü ega ngëmaãcü chi nüxũ
 chajaxögüxēëgu rü chanamaxēëgu i
 ngëma chautanüxügü i Judéugü. ⁴Rũ
 nümagü rü chauxrüü Judéugü nixĩgü.
 Rũ Tupana rü nuxcümamaxüchima namaã
 inaxuneta na naxãcügü jixĩgüxüçax. Rũ

norü oxigü rü nüxũ nadaugü na
 nhuxãcü namexëchixũ ga Tupana ga
 jexguma naxçax nangoxgux. Rũ Tupana
 rü norü oxigümaã inaxuneta rü
 nhanagürü nüxũ:

“Rũ ngëxguma chauga pexĩnüëgu rü
 tá pexũ charüngüxēē”,

nhanagürü nüxũ. Rũ Tupana rü nüxna
 nanaxã ga jema mugü ga Muísé
 ümatüxũ. Rũ nanangüexēē na nhuxãcü
 nüxũ jacuaxüügüxüçax. Rũ meãma
 namaã inaxuneta na Cristu rü naxçax
 núma tá namuãxũ na namaxëxëãxüçax
 rü nüxna na naxããxüçax i maxũ i
 taguma gúxũ. ⁵Rũ jema
 nuxcümamaxügüxü ga tórü oxigütaa nixĩgü
 i ngëma Judéugü, rü ngëmacax naxçax
 ta nixĩ ga jema uneta ga tórü oxigümaã
 nüxũ jaxuxũ ga Tupana. Rũ ngëma
 Judéugütanüxüwatama nixĩ ga nabuxũ
 ga Cristu ja Tupanaxüchi ixcü ja
 guxüétüwa ngëxmacü. Rũ tanaxwaxe i
 guxüguma nüxũ tikuaxüügü. Rũ
 ngëmaãcü jixũ. ⁶Rũ nhuxma rü woo
 tama guxũ i Judéugü na jaxögüxũ,
 notürü taxucüriwama texé nüxũ tixu na
 Tupana rü tama janguxëãxũ i ngëma
 norü uneta. Erü ngëma Judéugü rü
 tama aixcuma guxüma Tupanaãrü
 duũxügü nixĩgü. ⁷Rũ tama guxüma i
 duũxügü i Abráútaagü ixĩgüxũ, rü
 aixcuma Abráútanüxü nixĩgü i
 Tupanapexewa. Jerü ga Tupana rü
 Abráúmaã nüxũ nixu, rü nhanagürü:

“Rũ cune ja Isaquitanüxügü tá nixĩ i
 aixcuma cutanüxügü ixĩgüxũ i
 chapexewa”,

nhanagürü. Rũ jemaãcü namaã
 inaxuneta woo na najexmaxũ ga togü ga
 Abráúxãcügü. ⁸Rũ ngëmawa meãma

nūxū tacuax rū tama ngēma na Abráūtaa tixīgūxūcax nixī i Tupanaxācūgū tixīgūxū. Notürü jixema aixcuma Tupanaārū uneta nūxū ixuxūrūūācūma jaxōgūxe waxi tixī ja aixcuma Abráūtaa ixīgūxe i Tupanapexewa. ⁹Jerū naxūpa ga na nabuxū ga Abráū nane, rū jema Tupanaārū uneta ga Abráūmaā nūxū jaxuxū, rū nhanagürü:

“Rū naī ja tauneciārū nhūxgumaācū tá wena nuā chaxū, rū cuxmax i Chara rū tá ixāxācū i ngēxguma”,

nhanagürü. ¹⁰Notürü tama Abráūmaāxīcatama nixī ga jemaācū jadexaxū ga Tupana. Jerū tórū oxī ga Isaqui namax ga Rebecamaā rū ta nidexa ga Tupana. Rū ngīma rū ngīteaxū ixāxācū rū nataxreexpūx ga ngīne. ¹¹⁻¹³Notürü jexguma taūta nabuegu rū taxuūma ga mexū rū exna chixexū naxūegu ga jema ngīnegū, rū Rebecamaā nidexa ga Tupana, rū nhanagürü:

“Rū ngēma nūxīra buxū i cune, rū ngēma wixweama buxūārū duūxū tá nixī”,

nhanagürü ngīxū. Rū jema dexa rū namaā nawūxigu i Tupanaārū ore i ūmatūxū i nhaxū:

“Marū chanajaxu ja Jacú, notürü nūxū chaxo ja Echaú”,

nhaxū. Rū jemaācū ga Tupana rū ngīmaā nanangoxēē na namexwa nangēxmaxū na tūxū jadexechixū ja jixema woetama nūxū ngúchaūxē na tūmacax naçaxū tama nagu naxīnūācūma i tacū na taxūxū. ¹⁴¿Rū nhuxū nhagūxū i nhūxmax? ¿Pexçax rū

Tupana rū chixexū naxūxū ga jexguma tama Jacúxū nangechaūxūrūū nūxū na nangechaūgu ga Echaú? Rū dūcax, tama chixexū naxū. ¹⁵Jerū norū orewa rū Tupana rū Muíséxū nhanagürü:

“Rū ngēxguma chi texémaā chamecūmachaūgu, rū tūmamaā tá chamecūma. Rū choxū tá tangechaūtūmūū ja jixema choxū ngechaūtūmūūchaūxē”,

nhanagürü. ¹⁶Rū ngēmaācū tama ngēma tūmatama tanaxwaxexūgagu rū exna ngēma taxūxūgagu nixī i Tupana tūxū jaxuxū ja texé. Notürü tūxū najaxu erū nūxū tangechaūtūmūū. ¹⁷Rū jexgumarūū ta ga Tupana rū norū ore i ūmatūxūwa rū nhanagürü nūxū ga Ejjituaneārū āēxgacū:

“Rū āēxgacūxū cuxū chingucuchixēē na cuwa duūxūgūxū nūxū chadauxēēxūcax i nhuxācū na chaporaxū. Rū ngēmaācū chanaxū na guxū i duūxūgū i guxū i naānewa ngēxmagūxū, nūxū na cuáxūcax i chauchiga”,

nhanagürü. ¹⁸Rū ngēmaācū ja Tupana rū nūxū tangechaūtūmūū ja jixema nūxū ngechaūtūmūūchaūxē. Rū ngēxguma tūxū nataiāchiarū maxūāxēēchaūgu rū tūxū nanataiāchiarū maxūāxēē ja jixema tama nūxū cuáxchaūxē. ¹⁹Notürü bexmana tá nhacurīgū choxū:

“Rū ngēxguma chi ngēmaācū jixīgu ja Tupana, ¿rū tūxçūū nūxū nixu na tagagu jīxū na chixexū ixūgūxū rū tama naga ixīnūēxū? ¿Rū texé tapora na itajanaxoxēēxūcax i Tupanaārū ngúchaū?” nhacurīgū tá. ²⁰Notürü Pa

Duīxūx, ģtexé cuixī i cuma rü ngēmacax ngēmaācü Tupanaxū cujaxūgaxū? ģCuxcax rü exna wūxi i tūxū i waixūmūwa ūxū rü namexū i ngēma norū ūruūmaā na nhaxū?

“ģRü tūxcūū ngēmaācü choxū cuxū na ngēmaācü chixūcūcax i nhuxmax?” nhaxū. ²¹Rü ngēma tūxūārū ūruū rü waixūmūwa nanaxū i tacū i nūma naxūxchaūxū. Rü ngēxguma nanaxwaxegu, rü ngēma waixūmūwa nanaxū i wūxi i tūxū na norū merū jīxūcax. Rü ngēxguma nanaxwaxegu, rü ngēmatama waixūmūwa nanaxū i wūxi i tūxū na norū guxchirechixū jīxūcax. ²²Rü ngēxgumarūūtama nixī i naxūāxū ja Tupana. Erū tūxū nanawéxchaū na nhuxācü naporaxū i nūma rü nhuxācü napocueāxū i ngēma duīxūgū i chixexū ūgūxū, notürü poraācü jaxna namaā naxīnū i ngēma duīxūgū, rü tama paxa nanapocue i ngēma ímemaregūxū na napocuexū. ²³Notürü ga Tupana rü inanawéxchaū na nhuxācü poraācü tamaā namecūmaxū i jixema na jaxōgūxū. Rü ngēmacax nixī i nūxū ingechaūtūmūūgūxū, rü nuxcūmatama tūxū jadexchixū na naxūtawa ingēxmagūxūcax i dauxūgūxū i naānewa i ngextá ínamexēchixūwa. ²⁴Rü ngēmaācü i jixema na Judégū ixīgūxū, rü tatanūwa Tupana tūxū nidexechi ja nhuxre na norū duīxūgū tixīgūxūcax. Rü ngēxgumarūū ta i ngēma tama Judégū ixīgūxūtanūwa rü najadexechi i togū. ²⁵Rü ngēmacax rü Tupanaārū ore ga Ochéa ūmatūxūwa rü nhanagürü:

“Rü ngēma duīxūgū i tama chorü duīxūgūchirex ixīgūxū, rü:

‘Pema rü chorü duīxūgū peixīgū i nhuxmax’, nhacharügü tá nūxū. Rü ngēma duīxūgū i tama Judégürü nūxū changechaūchiréxū, rü: ‘Pexū changechaū i nhuxmax’, nhacharügü tá nūxū. ²⁶Rü noxri ga Tupana rü jema duīxūgū ga tama Judégū ixīgūxūmaā nūxū nixu, rü nhanagürü nūxū: ‘Pema rü tama chorü duīxūgū peixīgū’, nhanagürü nūxū. Notürü jematama nachica ga ngextá nūxū íjemanhaxūwa, rü wenaxārū jema duīxūgū ga tama Judégū ixīgūxūmaā nidexa ga Tupana ja Maxēxēruū, rü nhanagürü nūxū: ‘Pema rü chauxacügü tá peixīgū’, nhanagürü nūxū”.

Rü jema nixī ga Tupanaārū ore ga Ochéa ūmatūxū. ²⁷⁻²⁸Rü Judégūchiga rü ta nidexa i Tupanaārū ore, jerū nuxcūmaxūcü ga norū orearū urū ga Ichaía rü nhanagürü:

“Rü woo namuxūchichirex i Judégū jima naxnūcü ja taxtūpechinūwa jimacürüū, notürü noxre tátama nixī i aixcuma najauxgūxū i maxū i taguma gūxū. Rü paxa tá ínangu ja tórü Cori na napocueāxūcax i gūxūma i ngēma tama noxri ixīgūxū”, nhanagürü ga Ichaía. ²⁹Rü nūmatama ga Ichaía, rü nhanagürü ga ūpa:

“Rü ngēxguma chi nūma ja tórü Cori ja gūxū i naāneārū jora rü tau chima íjaxūgūxēēgu i nhuxre i tatanūxūgū i Judégū,

rū chi itajarūxoxochi,
jexgumarūũ ga na ijanaxogūxũ
ga guma ĩānegū ga Chodoma rū
Gomora namaā ga guxũma ga
jema duũxũgū ga jema
jexmagūxũ”,
nhanagürü ga Ichaía.

**Judégū rū tama najaxögüchaũ i
ore i mexĩ i Cristuchiga**

³⁰¿Rū nhuxũ nhagūxũ i nhuxmax? Rū
pemaā nūxũ chixu rū ngēma duũxũgū i
tama Judégū ĩxīgūxũ ga tama
Tupanaçax daugūxũ ga noxrix, rū
ngēmatama duũxũgū nixĩ i nhuxma
Tupanapexewa imexũ jerũ najaxögü.
³¹Notürü jema Judégū ga nagu
ĩxchaũxũ ga jema Muíséarũ mugũ na
Tupanapexewa jamexũçax, rū ĩnatüe.
³²¿Rū nhuxäcü ĩnatüe? Düçax, ĩnatüe
jerũ jema mugũguma naxĩ na
Tupanapexewa jamexũçax, rū tama
Ngechuchuaxũ najaxögüchaũ. Rū
jemaäcü ga Ngechuchu rū jema
duũxũgüçax rū wüxi ga guxchaxũ nixĩ.
³³Rū ngēmachiga nixĩ i Tupanaärü ore i
ümatüxũ i nhaxũ:

“Chama rū Judégütanüwa
chanamu ja Cristu. Rū nüma rū
ngēma Judégüçax rū wüxi i
guxchaxũ tá nixĩ erũ ngēxguma
tama nūxũ jaxögüägu rū tá
inajarütaxe. Notürü ngēma
duũxũgü i nūxũ jaxögūxũ, rū
aixcuma tá namaxē”,

nhanagürü.

10 ¹Pa Chaueneégüx, rū ngēma
poraäcü chanaxwaxexũ rū
chorü jumuxēwa Tupanana naxçax
chaçaxũ, rū ngēma nixĩ na guxũma i

chautanüxũgü i Judégü na jaxögüxũ rū
ngēmaäcü aixcuma Tupanaärü na
jixīgüxũçax. ²Rū aixcuma pemaā nūxũ
chixu, rū nūmagü i Judégü rū aixcuma
poraäcü Tupanagu narüxinüē rū
nanaxügüchaũ i Tupanaärü ngüchaũ.
Notürü ĩnatüe erũ tama Cristuaxũ
najaxögüchaũ na ngēmaäcü
Tupanapexewa jamexũçax. ³Rū woo
Tupana nhama ga naānewa nanamu ga
Cristu na gumagagu Tupanapexewa
jamexũçax i duũxũgü, notürü nūmagü i
Judégü rū tama nūxũ nacuaxgüchaũ i
ngēma. Rū nügütama nímexēgüchaũ,
rū ngēmacax nagu naxĩama i ngēma
mugü ga Muísé ümatüxũ rū tama
Cristuaxũ najaxögüchaũ na nagagu
Tupanapexewa jamexũçax. ⁴Notürü
nüma ga Cristu rū najanguxē ga jema
mugü rū jemaäcü inajanaxoxē na tama
tamaā inacuáxũçax i ngēma mugü. Rū
jemaäcü nanaxü ga Cristu na guxũma i
duũxũgü i nūxũ jaxögüxũ rū aixcuma
Tupanapexewa jamexũçax. ⁵Rū Muísé
nanaxümatü nachiga na nhuxäcü
Tupanapexewa tamexũ ja wüxie ega
naga taxĩnügu i ngēma mugü, rū
nhanagürü:

“Tupana pexũ namu na guxũgutáma
meā pejanguxēxũ i guxũma i
ngēma mugü erũ ngēxguma
naga pexĩnüēgu i guxũma i
ngēma mugü rū tá pemaxē.
Notürü ngēxguma tama naga
pexĩnüēgu i wüxitama i ngēma
mugü, rū tāüxütáma pemaxē”,

nhanagürü. ⁶Notürü nhuxma rū
Tupanapexewa time ega Cristuaxũ
jaxögügu. Rū ngēmacax taxuüçaxma i
cuāēwa rū nhacurügu:

“¿Texé tá dauxūguxū i naānewa taxū na Cristucax tajaçaxū na nuā naxūxūçax rü tūxū janangūxēēxūçax na imexūçax i Tupanapexewa?” nhacurūgū. ⁷Rü taxuūçaxma cuāēwa nhacurūgū:

“¿Rü texé tá juexūtaniwa taxū na ngēxma Cristucax tajadauxūçax na nuā tanagaxūçax?” nhacurūgū. ⁸Erū tama ngēmaācü nixī i Cristucax idaaxū, jerū jema ore ga Muísē ūmatūxū rü nhanagürü:

“Rü marū cuxūtawa nangēxma i Tupanaärü ore. Rü cuaxwa nangēxma na nüxū cuixuxūçax. Rü cuāēwa nangēxma na nagu curūxīnūxūçax”,

nhanagürü. Rü nhuxma Pa Chaueneēgūx, rü pemaā nüxū chixu rü ngēmatama ore nixī i guxūwama duūxūgūmaā nüxū tixuxū. Rü ngēma ore nixī i pexū nüxū cuaxēēxū na nhuxācü pexū nangēxmaxū i maxū ega aixcuma pejaxōgūgu. ⁹Erū ngēxguma cuaxmaā nüxū cuixuxgu na curū Cori jīxū ja Ngechuchu, rü ngēxguma cuāēwa cujaxōxgu na juwa Tupana ínadaxēēxū, rü tá cuxū nangēxma i maxū i taguma gūxū. ¹⁰Erū taāēwa tajaxōgū na ngēmaācü Tupanapexewa imexū. Rü taçxmaā nüxū tixu na Ngechuchu rü tōrū Cori jīxū, rü ngēmaācü tanajaxu i maxū i taguma gūxū. ¹¹Rü Tupanaärü ore i ūmatūxūwa rü nhanagürü:

“Rü guxāma ja texé ja Ngechuchuaxū jaxōxē, rü tá nüxū tadau na nhuxācü Cristu aixcuma janguxēēxū i ngēma tamaā inaxunetaxū, rü tāxūtāma āxūachi tūxna naxā”,

nhanagürü. ¹²Rü Tupanapexewa rü guxūma i duūxūgū rü nawūxigu. Rü woo Judēgū jixīgu rü exna woo tama Judēgū jixīgu, notürü Tupanapexewa rü nawūxigu i guxūma i duūxūgū. Erū nüma ja tōrū Cori, rü guxāärü Cori nixī. Rü nüma rü aixcuma tūxū namaxēxēē ja guxāma ja texé ja nüxna çaxe na tūxū namaxēxēēxūçax. ¹³Erū Tupanaärü ore i ūmatūxūwa rü nhanagürü:

“Rü guxāma ja texé ja tōrū Corina çaxe na tūxna naxāxūçax i maxū, rü tá tanajaxu i tūmaärü maxū i taguma gūxū”,

nhanagürü. ¹⁴¿Notürü nhuxācü tá tōrū Corina naxçax tacagū, ega tama nüxū tajaxōgūgu? ¿Rü nhuxācü tá nüxū tajaxōgū, ega taguma nüxū taxīnūēgu i nachiga? ¿Rü nhuxācü tá nüxū taxīnūē i norū ore, ega taguma texé tūmamaā nüxū ixuxgu? ¹⁵¿Rü nhuxācü tá texé nüxū tixu i Cristuchiga ega taxūema tūxū nüxū jarūxuxēēgu? Rü ngēmacax nixī i Tupanaärü ore i ūmatūxū i nhaxū:

“Rü wūxi i taāē nixī na ínangugūxū i Tupanaärü oreatū uruūgū na duūxūgūmaā nüxū jaxugūxūçax i Tanatüarū ore i mexū i Cristuchiga”,

nhaxū. ¹⁶Notürü tama guxūma i duūxūgū naga naxīnūē i ngēma ore i mexū. Rü Ichaía nüxū ixuxūrū nixī. Jerū ga nüma rü nhanagürü:

“Pa Corix, noxretama nixī i ngēma duūxūgū i toxū jaxōgūxū i ngēma ore i nüxū tixuxū”,

nhanagürü. ¹⁷Rü dücax, rü ngēma na Cristuchigaxū naxīnūēxūwa nixī i ne naxūxū na jaxōgūāxū i duūxūgū. Rü ngēma nüxū naxīnūēxū, rü ore i mexū i

Cristuchiga nixī. ¹⁸Notürü i nhuxma rü pexna chaca, ¿exna pexçax rü ngēma Judéugü rü taguma nüxũ naxĩnũē i ngēma ore i mexũ i Cristuchiga? Dücax, ngēmáácü marü nüxũ naxĩnũē. Erü Tupanaärü ore i ümatüxüwa rü nhanagürü:

“Rü ngēma Tupanaärü orearü uruũgü, rü guxũwama i nhama i naãnewa rü nüxũ nixugüē i norü ore. Rü ngextá íngängëmagüxüwa i Judéugü, rü ngēma rü ta nüxũ nixugügü”,

nhanagürü i ngēma ore. ¹⁹Notürü wena pexna chaca, ¿rü ngēma Judéugü rü tama exna nüxũ nicuaxächitanü na Cristugagu jĩixũ na Tupana nadexũ i duũxügü i nhuxmax? Rü ngēmáácü nüxũ nacuaxgü. Jerü Tupanaärü ore ga Muísé ümatüxüwa rü nhanagürü:

“Dücax, Pa Judéugüx, chama rü tá chanamaxëxëē i ngēma duũxügü i tama Judéugü ixigüxũ, rü ngëmacax i pema rü tá pixãuxächigü. Rü ngëxguma chanamaxëxëēgu i ngēma togü i duũxügü i tama choxũ cuaxgüchirëxũ, rü pema i Judéugü rü tá penuē erü nüxũ charüngüxëē i ngēma togü”, nhanagürü. ²⁰Rü jemawena ga Icháíwa, rü tama namuũ ga jema Judéugümaã nüxũ na jaxuxũ ga jema Tupanaärü ore ga nhaxũ:

“Rü ngēma duũxügü i tama Judéugü ixigüxũ i tama chauxçax daugüxũ, rü choxũ tá inajangaugü. Rü chama rü tá chaugü changoxëē naxçax i

ngēma duũxügü i tama chauxçax ícagüchirëxũ”, nhaxũ. ²¹Rü Tupana rü Icháíawa Judéugüchiga nidexa rü nhanagürü: “Rü guxũ i ngunexügu rü nüxna chaxuecha i ngēma duũxügü i tama chauga ñnüëchaũxũ rü chamaã nuëxũ. Notürü tama choxũ inarüxĩnũëchaũ”, nhanagürü.

Nangëxma i nhuxre i Judéugü i Tupana idexechixũ na aixcuma noxrü jixigüxüçax

11 ¹Nhuxma pexna chaca rü, ¿pexçax exna ja Tupana rü marü nüxũ naxo i norü duũxügü i Judéugü? Tama nixī i nüxũ naxoxũ. Erü chama i Pauru rü Judéu chixī. Rü Abráütanüxũ chixī, rü Abráütaja ja Bejamítanüxũ chixī. ²Rü nuxcümamatama Tupana Judéugümaã inaxuneta na norü duũxügü jixigüxüçax, rü nhuxma rü tama Judéugüxũ naxo. ¿Tama exna nüxũ pecuax na nhuxü nhaxũ ga Tupanaärü orearü uruũ ga Ería? Rü Tupanaärü orewa nüxũ tadaugü rü Ería rü Tupanapexewa poraäcü jema Judéugüxũ ínaxuaxũ. ³Rü nhanagürü ga Ería:

“Pa Corix, ngēma Judéugü rü marü nanadai i curü orearü uruũgü. Rü nagu napogüē i ngēma nachicagü i ngextá duũxügü cuxũ ícuaxüügüxüwa. Rü chaxicatama íchajaxüächi. Rü choxũ rü ta nimaxgüchaũ”, nhanagürü ga Ería. ⁴Notürü Tupana nanangãxũ, rü nhanagürü:

“Dücax, chama rü marü choxũ nangëxma i 7000 i jatügü i

chaugūcax chidexechixŭ. Rŭ
 nŭmagŭ rŭ taguma nŭxŭ
 nicuaxŭŭgŭ i ngēma
 tupananetachicūnqā i Baáu”,
 nhanagŭrŭ. ⁵Rŭ ngēxgumarŭŭ ta nixŭ i
 nhŭxmax. Rŭ woo muxŭma i Judēgŭ
 tama najaxōgŭ, notŭrŭ nangēxma i
 nhuxre i Tupana namaā mecūmaxŭgagu
 jadexechixŭ. ⁶Rŭ nhŭxma na Tupana
 namaā mecūmaxŭgagu jadexechixŭ i
 ngēma duŭxŭgŭ, rŭ ngēmacax
 taxucŭrŭwama texé nŭxŭ tixu na ŭacŭ
 rŭ puracŭ i mexŭcax na jadexechiāxŭ.
 Eri ngēxguma chi ngēma duŭxŭgŭari
 puracŭ i mexŭcax jadexechiāgu, rŭ
 taxuŭcax chima tŭxcŭŭ Tupana namaā
 namecūma. ⁷ŶRŭ nhuxācŭ jŭixŭ i
 nhŭxmax? Rŭ ngēma rŭmumaēxŭ i
 Judēgŭ rŭ tama nŭxŭ inajangaugŭ i
 ngēma maxŭ i naxcax nadaugŭxŭ.
 Notŭrŭ ngēma noxretama i Judēgŭ i
 Tupana idexechixŭ, rŭ ngēmaācŭ nŭxŭ
 inajangaugŭ i ngēma maxŭ. Rŭ guxŭma
 i ngēma togŭ i Judēgŭ rŭ Tupana nŭxŭ
 nanaguxchaxēē. ⁸Rŭ ngēmachiga nixŭ i
 Tupanaārŭ ore i ūmatŭxŭ i nhaxŭ:

“Tupanatama ngēma duŭxŭgŭaxŭ
 nanaguxchaxēē. Rŭ ngēmacax
 woo nŭxŭ nadaugŭgŭ i ngēma
 ore i aixcuma ixŭxŭ, rŭ tama
 nŭxŭ nacuaxgŭéga. Rŭ woo
 nŭxŭ naxŭnŭēgu i ngēma ore, rŭ
 tama najaxōgŭ. Rŭ nhŭxma rŭ
 ta ngēmaācŭ nixŭ”,

nhanagŭrŭ. ⁹Rŭ Dawŭ rŭ ta rŭ
 nhanagŭrŭ:

“Rŭ ngēma duŭxŭgŭ rŭ norŭ
 petacax naxŭgŭxŭ i ōnagŭgagu
 rŭ norŭ muxŭma i
 ngēmaxŭgŭgagu rŭ chixexŭgu

tá naji rŭ ngēmacax tá napocue.

¹⁰Rŭ naāēwa rŭ tāxŭtáma
 nŭxŭ nacuaxgŭ, rŭ guxchaxŭgŭ
 tá nŭxŭ nangēxma. Rŭ nhama
 wŭxi i duŭxŭ i ŭacŭ i jaxŭ
 ípaxixŭrŭŭ tá nixŭgŭ namaā i
 norŭ guxchaxŭgŭ”,

nhanagŭrŭ.

**Tupana nanamaxēxēē i ngēma togŭ
 i tama Judēgŭ ixŭgŭxŭ**

¹¹Rŭ pexna chaca, rŭ nhŭxma na
 Cristuxŭ naxoexŭ i ngēma Judēgŭ, Ŷrŭ
 pexcax exna rŭ ngēmacax ja Tupana rŭ
 tá nŭxŭ naxoxochixŭ? Tama nŭxŭ naxo.
 Notŭrŭ nhŭxma na tama Cristuaxŭ
 jaxōgŭāxŭ i ngēma Judēgŭ, rŭ
 ngēmacax ja Tupana rŭ nŭxŭ
 narŭngŭxēē rŭ nanamaxēxēē i ngēma
 togŭ i tama Judēgŭ ixŭgŭxŭ. Rŭ
 ngēmaācŭ nanaxŭ ja Tupana na
 jaxāxŭachiexŭcax i ngēma Judēgŭ, rŭ
 Cristuaxŭ na jaxōgŭāxŭcax. ¹²Rŭ jema
 na ínatŭexŭ ga jema Judēgŭ, rŭ
 jemagagu muxŭma ga togŭ ga duŭxŭgŭ
 nanajauxgŭ ga Tupanaārŭ ngŭxēē i
 taxŭ. Rŭ jema na noxretama ga Judēgŭ
 najaxōgŭxŭ, rŭ jemagagu Tupana
 nanamaxēxēē ga jema tama Judēgŭ
 ixŭgŭxŭ. Notŭrŭ ngēxguma tá
 Tupanacax nawoegŭxgu i guxŭma i
 Judēgŭ, rŭ Tupana rŭ tá jexeraācŭ
 nŭxŭ narŭngŭxēē i guxŭma i ngēma
 duŭxŭgŭ i tama Judēgŭ ixŭgŭxŭ.
¹³⁻¹⁴Rŭ nhŭxma Pa Duŭxŭgŭ i Tama
 Judēgŭ Ixŭgŭxŭ, rŭ choxŭ nangēxma i
 wŭxi i ore i pemaā nŭxŭ chixuxchaŭxŭ.
 Rŭ dŭcax, petanŭwa nixŭ i choxŭ
 namuxŭ ja Tupana na pemaā nŭxŭ
 chixuxŭcax i norŭ ore. Rŭ nhŭxma rŭ

aixcuma meã chajanguxẽẽ i ngẽma puracũ, erũ chanaxwaxe na pexũ nadaugũxũ i ngẽma chautanũxũ i Judéugũ na nhuxácũ Tupana pexũ na rüngũxẽẽxũ. Rũ ngẽmaãcũ tá nixãũxãchie i nhuxre i nũmagũ, rũ tá Cristuaxũ najaxögũ, rũ ngẽmaãcũ tá nanajauxgũ i maxũ i taguma gũxũ. ¹⁵Nũxũ tacuax rũ ngẽma Judéugũ rũ tama Cristuaxũ najaxögũchaũ i nhuxmax. Rũ ngẽmacax ja Tupana rũ nanade i ngẽma togũ i duũxũgũ i tama Judéugũ ixĩgũxũ. Notürũ nhuxma na ngẽmaãcũ jĩxũ, ¿rũ nhuxácũ tá nixĩ i ngëxguma Cristuaxũ jaxögũãgu i ngẽma Judéugũ, rũ wena Tupana nadexgu? Rũ wüxi i mexëchixũ tá nixĩ naxçax i ngẽma Judéugũ. Erũ nhama wüxi i duũxũ i juxũ rũ wenaxãrũ maxũxũrũũ tá nixĩgũ. ¹⁶Rũ Tupana rũ wena tá nanade i ngẽma Judéugũ i ngëxguma jaxögũãgu. Rũ ngẽmaãcũ tá nixĩ, jerũ nuxcũmaxũcũ ga nanatũ ga Abrãũ rũ Tupanaãrũ duũxũ nixĩ. Rũ ngẽmacax i nataagũ i Judéugũ rũ Tupanaãrũ duũxũgũ ta nixĩgũ. Rũ nhama wüxi i põũ i Tupanana ixãxũrũũ tá nixĩ. Erũ ngëxguma ngẽma põũwa íraxũ Tupanaãrũ jixĩgu, rũ ngẽmawa nũxũ tacuax na guxũma i ngẽma põũ rũ noxrũ na jĩxũ. Rũ ngẽma wüxi i nanetũ i Tupanana ixãxũrũũ tá nixĩ. Rũ ngëxguma ngẽma nanetũchumaxã rũ Tupanaãrũ jixĩgu, rũ ngẽmawa nũxũ tacuax na guxũma i ngẽma nanetũ rũ noxrũ na jĩxũ. Rũ ngẽmaãcũ tá nixĩ i ngẽma Judéugũmaã nangupetũxũ, erũ wüxi i ngunexũgu rũ guxũma i nũmagũ rũ Tupanacax tá nawoegu. ¹⁷Tupana nũxũ naxo ga jema Judéugũ ga tama

jaxögũchaũxũ. Rũ nhama wüxi i orichacũũ i idaexũrũũ nixĩ ga jema Judéugũxũ naxoxũ. Notürũ nachicũũ Tupana pexũ nade woo tama Judéugũ na peixĩgũxũ. Rũ wüxi i naixnecũcũãx i orichacũũ rũ ori i toxũwa jarũnhaxcuchixũrũũ peixĩgũ. Rũ nhuxma i pema rũ ta pexũ nangëxma i pechica i natanũwa i ngẽma duũxũgũ i Tupanaãrũ ixĩgũxũ. Rũ Tupana rũ pexũ narüngũxẽẽ rũ pexũ rũ ta namaxëxëẽ. ¹⁸Notürũ pema i tama Judéugũ na peixĩgũxũ, rũ tama name i pegũ peicuaxũũ rũ nũxũ peixu na ngẽma Judéugũarũ jexera peixĩgũxũ. Rũ ngëxguma chi ngẽmaãcũ pegũ peicuaxũũgũchaũgu, rũ name nixĩ i nũxna pecuaxãchie na tama petanũwa ne naxũxũ ga Cristu ja pexũ maxëxëcũcũ, notürũ Judéugũtanũwa nixĩ ga ne naxũxũ. Rũ ngẽma Judéugũgagu nixĩ i Tupana pexũ dexũ rũ pexũ namaxëxëẽxũ i nhuxmax. ¹⁹Notürũ bexmana tá nhaperũgũgũ:

“Tupana rũ marũ nũxũ naxo ga jema Judéugũ rũ jemacax nachicũũ tũxũ nade”, nhaperũgũgũ tá. ²⁰Ngẽmaãcũ aixcuma nixĩ ga Tupana nũxũ oxũ ga jema Judéugũ jerũ tama najaxögũ. Rũ ngẽma na pejaxögũxũçaxicatama nixĩ i nachicũũ Tupana pexũ dexũ i nhuxmax. Rũ ngẽmacax tama name i pegũ peicuaxũũgũ. ¡Notürũ pexuãëgũ na tama jema Judéugũxũ ÷petũxũrũũ pexũ ÷petũxũçax! ²¹Jerũ jema Judéugũ ga noxri Tupanaãrũ ixĩgũxũ, rũ Tupana nũxũ naxo jerũ tama najaxögũ. Rũ jexguma jemaãcũ Tupana nũxũ oxgu ga jema duũxũgũ rũ pexũ rũ tá ta naxo ega tãũxũtãma pejaxögũechagu. ²²Dũcax, na

nhuxācū namecūmaxũ ja Tupana. Notürü tũxũ napocu ta ega tama aixcuma jaxōgũgu. Rũ nanapocue ga jema duũxũgũ ga chixexũgu jixũ, notürü pemaã rũ namecūma. Notürü penaxwaxe i guxũguma nũma nanaxwaxexũãcūma pemaxẽ rũ pejaxōgũ na guxũguma pemaã namecūmaẽchaxũcax. Erũ ngẽxguma tama nũma nanaxwaxexũãcūma pemaxẽgu rũ tama pejaxōgũechagu, rũ tãxũtãma pemaã namecūma. Rũ pexũ rũ tá ta naxo, rũ tá pexũ ínawogũ.

²³Notürü ngẽxguma jaxōgũãgu i ngẽma Judéugũ i nhuxma maxẽxũ, rũ woo Tupana na nüxũ oxũ ga noxrix, notürü wena táxarũ nanade erũ nüxũ nangẽxma i pora na wenaxãrũ nadeãxũcax ega aixcuma jaxōgũãgu.

²⁴Rũ pema na tama Judéugũ na peixĩgũxũ, rũ tama Tupanaãrũ duũxũgũ peixĩgũ ga noxrix. Notürü Tupana pexũ nade na noxrũ peixĩgũxũcax. Rũ nhuxma na jemaãcũ Tupana pexũ dexũ, rũ ngẽxguma jaxōgũãgu i ngẽma Judéugũ, rũ Tupana rũ pexũ nadexũãrũ jexera tá nüxũ natauxcha na nadeãxũ i ngẽma Judéugũ, jerũ woetama norũ duũxũgũchirex nixĩgũ ga noxrix.

**Wũxi i ngunexũ rũ guxũma i
Judéugũ tá nanajauxgũ i maxũ i
taguma gúxũ**

²⁵Pa Chaueneẽgũ i Jaxōgũxũx, nangẽxma i wũxi i ore ga noxri tama duũxũgũxũ nüxũ nacuaxẽxũ ga Tupana. Notürü chanaxwaxe i nüxũ pecuax i ngẽma ore na tama nagu perũxnũẽxũcax na duũxũgũ i nüxũ cuaxũchixũ peixĩgũxũ, rũ pexicatama

Tupana pexũ dexũ. Rũ dücax, noxretama nixĩ i ngẽma Judéugũ i aixcuma jaxōgũxũ. Rũ ngẽmaãcũ tá nixĩ nhuxmatãta jaxōgũã i guxũma i ngẽma togũ i duũxũgũ i Tupana idexechixũ.

²⁶Notürü ngẽmawena rũ guxũtãma i Judéugũ rũ tá ta najaxōgũ, rũ tá nanajauxgũ i maxũ i taguma gúxũ. Erũ Tupanaãrũ ore i ũmatũxũwa rũ nhanagũrũ:

“Jima Cristu ja ínanguxũẽecũ, rũ Judéugũtaniuwatama ne naxũ. Rũ nũma rũ tá Judéugũxũ chixexũwa ínanguxũẽẽ. ²⁷Rũ aixcuma norũ pecaduwa tá íchananguxũẽẽ i ngẽma Judéugũ. Rũ ngẽxguma tá nixĩ na aixcuma chajanguxẽẽxũ i ngẽma chorũ uneta ga ũpaxũchima Abrãũmaã nüxũ chixuxũ”,

nhanagũrũ ga Tupana. ²⁸Notürü i nhuxma ja Tupana rũ Judéugũxũ nadau na norũ uwanũgũ jĩixũ erũ tama najaxōgũ i ngẽma ore i mexũ. Notürü ngẽmaãcũ naxũpetũ na pexũ natauxchaxũcax na pejaxōgũxũ i pema i tama Judéugũ na peixĩgũxũ. Notürü nũma ja Tupana rũ nhuxma rũ ta ngẽma Judéugũxũ nangechaũ jerũ nuxcūmaxũgũxũ ga norũ oxigũmaã inaxuneta na nüxũ tá nangũxẽẽxũ. ²⁹Rũ ngẽxguma Tupana rũ țacũ i mexũmaã inaxunetagu, rũ aixcuma najanguxẽẽ i ngẽma, rũ taguma nüxũ inajarũngũma. Rũ ngẽxgumarũũ ta i ngẽxguma texẽcax nacaxgu, rũ taguma nüxũ inajarũngũma i ngẽma. ³⁰Rũ pema na tama Judéugũ peixĩgũxũ, rũ ũpa rũ tama Tupanaga pexĩnũẽ. Notürü nhuxma na tama naga naxĩnũẽxũ i Judéugũ, rũ ngẽmacax

Tupanaāxū pēgechaūtümüügü erü pejaxōgü i pemax. ³¹Rü ngēma pexū ngupetüxürü nixi i ngēma Judéugüxū nangupetüxū. Nūmagü rü tama Tupanaga naxīnūē i nhuxmax, notürü ngēmaācü nūxū nangupetü na Tupanaāxū pēgechaūtümüügüxūcax, rü nūmagü rü ta Tupanaāxū nangechaūtümüügüxūcax i nhuxmax. ³²Jerü nūma ga Tupana rü guxūma ga duūxūgūmaā nanaxuegu na chixexūwa nangēxmagüxū nagagu ga norü pecadugü. Notürü jemaācü namaā nanaxuegu ga Tupana na nūxū nangechaūtümüügüxūcax i guxūma i duūxūgü. ³³Rü namexēchi ja tōrū Tupana, rü poraācüxūchima tüxū narūngūxēē. Rü nūma rü nūxū nacuaxūchi erü guxūxūma nacuax. Rü jixema rü taxucürüwama nūxū tacuax i tūxcūū jīxū i tüxū jadexechixū, rü taxucürüwama nūxū tacuax i guxūma i ngēma naxūxū i nūmax. ³⁴¿Erü texé i tatanūwa nūxū tacuax i guxūma i ngēma tōrū Cori nagu rüxīnūxū? ¿Rü texé nūxū tacuax na tōrū Corixū taxucuxēxū? ³⁵¿Rü texé tūxira tacü rü āmare tōrū Corina taxā, na jixcama nūxī tacūmaā tüxū nataeguxēēxūcax? ³⁶Erü guxūma i tacü ingēxmaxū rü Tupanaxūtawa ne naxī. Rü nūma nixi ga naxūāxū ga guxūma na noxrü jīxūcax. Rü name nixi i guxūguma nūxū ticuaxūgü rü tanataxēē. Rü ngēmaācü jīxū.

**Pexū chacaaxū na pegütama
Tupanana pexāgūxū na wūxi i
āmare i maxūxū na peixīgūxūcax**

12 ¹Rü dūcax, Pa Chaueneēgūx, nhuxācü Tupana poraācüxūchima tamaā namecūma. Rü

ngēmacax pexū chacaaxū na pegütama Tupanana pexāgūxū na wūxi i āmare i maxūxū na peixīgūxūcax. Rü ngēma āmare nixi i aixcuma napexewa üünexū rü namaā nataāēxū. Rü ngēmaācü nixi ja Tupana i nanaxwaxexū na nūxū peicuaxūgūxū. ²Rü tama name i nhama i naānecūāx i duūxūgūcūmagu pexī. Notürü name nixi i Tupanana pegü pexāgü na nūma pexū naxūchicūxūcax rü ngexwacaxūxū i peāē pexū ngēxmaxūcax rü ngēmaācü naxcaxicatama pemaxēxūcax. Rü ngēmaācü tá nūxū pecuax i tacü nixi i Tupana pexū naxwaxexū na penaxūxū, rü tacü nixi i aixcuma mexū i napexewa, rü tacü nixi i namaā nataāēxū. ³Rü Tupana ja chamaā mecūmacü, rü choxū namu na pemaā nūxū chixuxūcax i guxāma i pema na tama namexū na texe i petanūwa tūgü írütaxū rü tūgūgu tarūxīnūxū na togūarū jexera tīxū. Notürü name nixi na wūxichigü meā tūgü ngugūarū maxūāxū rü tūgūgu rüxīnūxū na nhuxācü Tupana tūxna naxāxū i tūmaārū cuax wūxigu namaā i tūmaārū ō. ⁴Rü dūcax, rü taxūnewa nangēxma i taeru rü tachacūgü rü taparagü rü muxūma i to i taxūneārū ngēmaxūgü. Rü wūxichigü i ngēma taxūneārū ngēmaxūgü rü nūxū nangēxma i noxrūtama puracü. ⁵Rü ngēxgumarū ta i jixema na jaxōgūxū, rü woo na imuxū notürü wūxitama i duūxūgü tixīgü, erü Cristuarū duūxūgü tixīgü. Rü ngēmacax i guxāma i jixema rü jigūmūcūgü tixīgü, erü woetama wūxitama i duūxūgü tixīgü. ⁶Rü wūxichigü i jixema, rü Tupana tūxna nanaxā i tōrū cuax i nūma nanaxwaxexū

na tūxū nangēxmaxū. Rū tanaxwaxē i meāma nagu taxī i ngēma cuax i Tupana tūxna āxū. Rū ngēxguma tūxna naxāāgu i tōrū cuax na norū orearū uruū ixīgūxūcax, rū name nixī i ngēma ō i tūxū ngēxmaxūmaā tanaxū i ngēma puracū. ⁷Rū ngēxguma tūxna naxāāgu i tōrū cuax na togūxū rūngūxēēgūxūcax, rū name nixī i meāma tanaxū i ngēma. Rū ngēxguma texēna naxāāgu i tūmaārū cuax na togūxū tangūxēēxūcax, rū name nixī i meāma tanaxū i ngēma. ⁸Rū jīxema nūxū cuāxe na Tupanaārū oremaā togūxū tataāēxēxū, rū name nixī i meāma tanaxū i ngēma. Rū jīxema nūxū cuāxe na togūmaā tangauxū i tūmaārū ngēmaxū, rū name nixī i tūmaārū ngūchaūmaā tanaxū i ngēma. Rū jīxema āēxgacū ixīxē rū name nixī i meāma tajanguxēē i ngēma puracū. Rū jīxema nūxū cuāxe na togū tūxū ngechaūtūmūūgūxū, rū name nixī i taāēcūma tanaxū i ngēma.

Nhuxācū nanaxwaxē na namaxēxū i duūxūgū i Cristuaxū jaxōgūxū

⁹Rū name nixī i aixcuma meāma pegū pengechaūgū i wūxichigū. ;Rū nūxū pexo i guxūma i tacū i chixexū ixīxū! ;Rū nagu pexī i ngēma aixcuma mexū ixīxū! ¹⁰Rū name nixī i wūxichigū pegū pengechaūgū, ngēma pegūeneēxūchixū pengechaūxūrū. Rū name nixī i naxcax pedaugū na nhuxācū peeneēgūxū petaxēēxū rū nhuxācū pegū perūngūxēēxū. ¹¹Rū tama name i cuxo ega tacū rū puracū cuxū namuxgu ja tōrū Cori. Notūrū name nixī i curū ngūchaūmaā cunaxū i norū puracū. ¹²Rū name nixī i petaāēgū erū

ípenanguxēē na Tupanaxūtawa pengūgūxū. Rū ngēxguma tacū rū ngūxū pexū ngupetūgu, rū name nixī i jaxna namaā pexīnūē. ;Rū tama name i nūxū perūchaue na pejumuxēgūxū! ¹³Rū ngēxguma nūxū pedaxgu na tacū nūxū taxuxū i ngēma togū i jaxōgūxū, rū name nixī i nūxū perūngūxēē. ;Rū meā penajaxu i ngēma duūxūgū i pexūtagu naxīānexū! ¹⁴Rū ngēxguma chi texē chixri pemaā ūpetūgu, rū name nixī i tūmacax pejumuxēgū na meā tūxū naxūpetūxūcax. Rū ngēmaācū name nixī i Tupanana tūmacax peca na tūxū nangūxēēxūcax rū tama tūxū napocuxūcax. ¹⁵;Rū wūxigu tūmamaā petaāēgū ja jīxema taāēgūxe! ;Rū wūxigu tūmamaā pexauxe ja jīxema ngechaūgūxe rū auxexe! ¹⁶;Rū meā pegūmaā pemaxē i wūxichigū! ;Rū tama pegū peicuaxūūgū, notūrū name nixī i pegū íperūxíragū! ;Rū tama pegū perūxīnūē na togūarū jexera nūxū cuaxūchigūxū na peixīgūxū! ¹⁷Rū ngēxguma texē chixexū pemaā ūxgux, ;rū tāxūtāma chixexūmaā pexūtanū! Notūrū name nixī i naxcax pedau na mexū pexūxū i guxū i duūxūgūpexewa. ¹⁸;Rū naxcax pedau na guxūma i duūxūgūmaā meā pemaxēxū rū namaā na íperūngūxmūxūcax i guxūguma! ¹⁹Pa Chaueneēgū ja Pexū Changechaūgūxe, tama name i pegūtama pexūtanū ega texē tacū rū chixexū pemaā ūxgu. Notūrū name nixī i Tupanamēxēgu penaxū i ngēma na nūma napocūāxūcax. Erū Tupanaārū ore i ūmatūxūwa rū nhanagūrū:

“Rū chaxmēxwa nangēxma na duūxūgūxū chapocuxū i norū

chixexūcaḡ. Rū chama tá nūxū
chanaxūtanū i ngēma duūxū i
chixexū ūxū”,

nhanagürü ja tórü Cori. ²⁰Rū ngēxguma
ḡacü rü chixexū cumaã naxūxgu i togü,
rü tama name i chixexūmaã
cunataeguxēē. Notürü name nixī i nagu
cuixū i Tupanaärü ore i nhaxū,

“Rū ngēxguma curü uwanū taijxgu,
jrü nachibūxēē! Rū ngēxguma
jaḡawaxgu, jrü naxaxēē! Erü
ngēxguma ngēmaãcü
cunaxūxgu, rü poraãcü tá
cunaxānexēē”,

nhaxū. ²¹Rū ngēxguma togü chixexū
cumaã ūxgux, rü name nixī i cuxuãē na
tama chixexūgu cunguxūcaḡ. Rū name
nixī na mexū cuxūxū namaã i ngēma
duūxū. Rū ngēmaãcü tá icujanaxoxēē i
ngēma chixexū i cumaã naxūxchaūxū.

13 ¹Rū name nixī i guxūma i
duūxūgü rü meã nórü
ãḡxgacüga naxīnūē. Erü Tupana nixī i
jangucuchixēēcü i guxūma i ãḡxgacügü.
Erü nataxuma i ãḡxgacü i tama Tupana
ingucuchixēēxū. ²Rū ngēmacax, texē ja
tama tūmaärü ãḡxgacüga ĩnūchaūxē, rü
Tupanaga nixī i tama taxīnūxū. Rū
jīxema tama naga ĩnūēchaūxē, rü tá
tapocue. ³Erü ngēma ãḡxgacügü rü
tama ngēma mexū ūgūxūärü pocuruū
nixī, notürü ngēma chixexū ūgūxūärü
pocuruū nixī. Rū ngēxguma
cunaxwaxegu na tama nūxū cumuūxū i
wūxi i ãḡxgacü, rü name nixī i meã
cumaxū. Rū nūma i ãḡxgacü rü tá
cumaã nataãē. ⁴Erü nūma i ãḡxgacü rü
Tupanaärü ngūxēēruū nixī rü ngēmacax
nanamu na cuxū nangūxēēxūcaḡ.
Notürü ngēxguma chixri cumaxūgu, rü

ngēxguma tá waxi nixī i nūxū cumuūxū.
Erü nūma i ãḡxgacü rü tama notūcaḡma
nixī na nūxū nangēxmaxū i pora na
cuxū napocuxū. Erü woetama Tupana
nanamu na napocuãxūcaḡ i ngēma
duūxū i chixri maxūxū. ⁵Rū ngēmacax
name nixī i naga cuxīnū i curü
ãḡxgacügü. Rū tama ngēma pocuxū na
cumuūxūcaḡicatama nixī i namexū na
naga cuxīnūxū, notürü name nixī i naga
cuxīnū erü marü nūxū cucuax na
namexū i ngēma. ⁶Rū ngēmacax name
nixī i meã nūxū penaxūtanū i ngēma
dīeru i perü ãḡxgacügücaḡ ixīxū i ngēma
nūmagü nagu naxunetaxūxpūx na
nūxū penaxūtanūxūcaḡ. Erü ngēma
ãḡxgacügü rü Tupanaãxū nixī i
napuracüexū i ngēxguma naxūãgu i
ngēma puracü na pemaã inacuáxū. ⁷Rü
wūxichigü i ngēma ãḡxgacügü, rü name
nixī i nūxna penaxā i ngēma nūxna ūxū.
jRü nūxū penaxūtanū i ngēma dīeru i
perü ãḡxgacügü nagu unetaxūxpūx na
nūxū penaxūtanūxū! jRü penaxūx i
ngēma ĩāneärü puracü i perü ãḡxgacügü
pexū muxū na penaxūxūcaḡ! jRü nūxū
pengechaūgü rü naga pexīnūē i ngēma
perü ãḡxgacügü! Erü ngēmaãcü nixī i
namexū na penaxūxū. ⁸Rü tama name i
texéaxū ḡacü pengetanū. Notürü
nangēxma i wūxitama i ngetanū i
taguma tūxū ĩngutanūxū. Rū ngēma nixī
na jigü ĩngechaūgūxū. Rū ngēmacax ja
jīxema aixcuma tūmamücūxū
ngechaūxē rü marü tajanguxēē i
guxūma i ngēma Tupana tūxū muxū.
⁹Rü nhanagürü i Tupanaärü mugü:
“jRü tāūxūtāma na i ngemaã icupe!
jRü tāūxūtāma cumáēta! jRü
tāūxūtāma cungīx! jRü

tāxūtāma toguāxārū ngēmaxū
cuxū nangúchaū!”

nhanagürü. Notürü ngēma mugü rü
guxūma i togü i Tupanaärü mugūmaā rü
wūxigu nanu nāgu i norü ore i nhaxū:

“¡Rü nüxū nangechaū i cumücü na
cugütama cungechaūxürü!”

nhaxū. ¹⁰Rü jíxema tümamücüxū
ngechaūxē, rü taxuūma i chixexū namaā
taxū. Rü ngēmacax i ngēxguma
tamücüxū ingechaūgu, rü aixcuma
tajanguxēē i Tupanaärü mugü. ¹¹Rü
name nixī i tanaxū i guxūma i ngēma,
erü nhamaücüü rü nangēxma i muxūma
i guxchaxūgü. Rü name nixī i pegü
ípemexēē rü paxa penaxū i tórü Coriarü
puracü. Erü nhuxma rü noxri
jaxōgüguarü jexera ningaicamachigü i
ngēma ngunexū i nāgu tá taxcax
nataeguxū ja tórü Cori. ¹²Rü woo na
naporaxū i Chataná i nhama i nañewa
i nhuxmax, notürü paxa tá nagux i
ngēma, rü paxa tá ínangu ja Cristu na
nügüxütawa tüxū nagagüxūcax. Rü
ngēmacax name nixī i nüxū tarüxoe i
guxūma i chixexū ixügüxū. Rü nhuxma
na nüxū icuáxū i Tupanaärü ore, ¡rü
ngíxā jígüna tadaugü na tama nāgu
ijixūcax i tacü rü chixexūgü! ¡Rü ngíxā
meā tamaxē na ngēmaācü nüxū
rújexeragüxūcax i guxūma i chixexū!
¹³¡Rü ngíxā mexū taxügü rü meā
tamaxē! Erü aixcuma Cristuarü duūxūgü
tixīgü, rü tanaxwaxe i nūma
nanaxwaxexūācüma tamaxē. Rü tama
name na ingāxēxū rü na naxügüxū i
petagü i chixexū i duūxūgü nawa
āñgatanüxū. Rü tama name i
tingēāēmare rü exna to i chixexū
taxügü, rü bai na jígü ichoxūgagüxū, rü

bai i togüchi ixaixēxū naxcax i norü
ngēmaxūgü. ¹⁴Notürü name nixī i
nacūmagu pexī ja tórü Cori ja
Ngechuchu ja Cristu, rü nüxna naxcax
peca na pexū nangūxēxūcax na meā
naxcax pemaxēxūcax. Rü tama name i
naxcax pedaugü na nhuxācü pexeneärü
ngúchaū na pexügüxū.

Tama name i nüxū cuixu i cueneē i jaxōxū

14 ¹Rü ngēxguma petanügu
naxāxchaūgu i wüxi i peeneē i
tama perüū meā Tupanaärü orexū
cuáxū, rü name nixī i meā penajaxu.
Notürü tama name i namaā pegü
pechoxūga naxcax i nacūmagü i nāgu
jaxūxū i Tupanapexewa. ²Rü dücax,
nangēxma i nhuxre i taeneēgü i nāgu
rūxīnūēxū na namexū na guxūraūxū i
ōna nangōxgüxū. Notürü nangēxma i
togü i taeneēgü i tama aixcuma meā
Tupanaärü orexū cuaxgüxū i tama
namachi ngōxgüchaūxū. Rü nūmagü
nüxū nacuaxgügu rü Tupanapexewa
nachuxu na tacü rü namachi
nangōxgüxū, rü ngēmacax nixī i nabü rü
origüxicatama nangōxgüxū. ³Rü
ngēxguma tangēxmagu ja texé ja
namachi ngóxē, rü tama name i nüxū
taxoox i ngēma togü i duūxūgü i tama
namachi ngōxgüxū. Rü ngēxgumarüū ta
ja jíxema tama namachi ngóxē, rü tama
name na nüxū tixuxū i ngēma duūxūgü i
namachi ngōxgüxū, erü nūmagü rü ta
Tupanaärü duūxūgü nixīgü. ⁴¡Rü texé
cuixī i cuma rü ngēmacax nüxū cuixu i
to i coriarü duūxūgü? Rü dücax, pemaā
nüxū chixu rü ngēma norü cori tá nixī i
nangugüxū rü ngoxi mexū naxūx i

ngēma norū duūxī, rū ɛxna tama. Rū ngēma duūxī rū Tupanapɛxewa rū tá name, erū nūma ja tórū Cori ja Cristu rū nūxū nangēxma i pora na nūgūcax namexēēaxū i ngēma duūxī. ⁵Rū dūcax, nangēxma i nhuxre i duūxūgū i nagu rūxīnūēxū na ngūxchigaarū ngunexū rū togū i ngunexūārū jexera namexū na nagu Tupanaxū jacuaxūūgūxū. Rū nangēxma i togū i duūxūgū i nagu rūxīnūēxū na guxūma i ngunexūgū rū nawūxīgūxū i Tupanapɛxewa. Notūrū wūxichīgū i jixema rū tanaxwaxe i meā taāēwa nūxū tacuax na aixcuma Tupanapɛxewa namexū i ngēma taxūxū rū tixōxū. ⁶Rū jixema duūxē ja tacū rū ngunexū Tupanacax ixūxūchixe, rū ngēmaācū tanaxū na ngēma ngunexūgu tórū Corixū ticuaxūūxūcax. Rū jixema namachi ngōxē, rū ngēmaācū tanangōx na tórū Corixū ticuaxūūxūcax, rū Tupanana moxē taxā naxcax i ngēma tangōxū. Rū jixema tama namachi ngōxē, rū ngēmaācū tanaxū na tórū Corixū ticuaxūūxūcax, rū tūma rū ta Tupanana moxē taxā naxcax i ngēma nabū i tangōxū. ⁷Rū nhuxma na nhama i naānewa imaxēxū, rū taxūema tūgūcaxtamama tamaxū rū ɛxna tūgūcaxtamama taju. ⁸Erū nhuxma na imaxēxū, rū tórū Coriarū ngūchaū na ixūgūxūcax nixī i imaxēxū. Rū ngēxguma ijuegu, rū ngēma rū ta tórū Corimexēwa nangēxma. Rū ngēmaācū nūxū tadau rū woo imaxēgu rū ɛxna woo ijuegu, rū tórū Coriarū duūxūgū tixīgū, rū namexwa tangēxmagū. ⁹Rū jemacax nixī ga najuxū ga tórū Cori ja Cristu rū wenaxārū namaxūxū na tūmaārū Cori jīxūcax ja guxāma ja

guxema jaxōgūxe ga marū juexe rū guxāma ja jixema jaxōgūxe ja nhuxma rū ta maxēxē. ¹⁰Rū ngēmacax Pa Chaueneēx, ɷrū tūxcūū i nūxū cuixuxū i cueneē i jaxōxū? Rū cumax, Pa To i Chaueneēx, ɷrū tūxcūū i nūxū cuxoxū i cueneē? Erū guxātāma i jixema rū Tupanapɛxewa tá tangugū na nūma tūxū nangugūxūcax rū ngoxi ime rū ɛxna tama. ¹¹Erū Tupanaārū ore i ūmatūxūwa rū nhanagūrū ja tórū Cori:

“Ngēma aixcuma na chamaxūxūrū tā ta nixī i aixcuma guxūtāma i duūxūgū chapexegu caxāpūxūgūxū, rū guxūtāma choxū icuaxūūgūxū”,

nhanagūrū. ¹²Rū ngēmaācū nūxū tacuax na wūxichīgū i jixema rū aixcuma tá Tupanapɛxewa na ingugūxū na namaā nūxū ixuxūcax na nhuxācū imaxēxū rū tacū na ixūxū.

Tama name i chixexūgu cunanguxēē i cueneē i jaxōxū

¹³Rū ngēmacax nixī, Pa Chaueneēgūx, i tama namexū na tamūcūgūxū ixuechaū. Notūrū narūmemaē nixī i nūxū perūxoe i guxūma i tacū i peeneēgūxū pecadugu jixēēxū rū ɛxna norū ōxū chixexēēxū. ¹⁴Chama nūxū chacuax rū nataxuma i ōna i Tupanapɛxewa chixexū. Rū aixcumaxūchi nūxū chacuax i ngēma erū tórū Cori ja Ngechuchu ja Cristuarū duūxū chixī, rū nūma choxū nūxū nacuaxēē i ngēma. Notūrū ngēxguma chi texē nagu rūxīnūgu na tama Tupanapɛxewa namexū i tacū rū ōna na tangōxū, rū name nixī i noxtacūma tama na tanangōxū ega nagu tarūxīnūgu

na tama namexũ i ngẽma. ¹⁵Rũ ngẽxguma ngẽma cungóũcax tũmaãẽwa cunanguxẽẽgu ja cueneẽ, rü cumaã nüxũ chixu rü tama aixcuma tüxũ cungechaũ. Rũ tama name i ngẽma cungóũgagu chixexũgu tüxũ cunguxẽẽ rü tüxũ icujarũtauxẽẽ ja jíxema cueneẽ ja Cristu tũmacax juxe. ¹⁶Rũ ngẽmacax, woo cuxcax namexgu i ngẽma cuxũxũ, notürü tama name na cunaxũamaxũ ega ngẽmacax togü tá cuxũ ixuxgu na pecadu jíxũ i ngẽma cuxũxũ. ¹⁷Rũ ngẽma Tupanapexewa na imexũcax rü tama řacu rü õna na ingóxũ rü exna řacu rü axexũ na ixaxũxũgagu nixĩ. Notürü napexewa na imexũcax rü tanaxwaxe i Naãẽ i Üünexũãrũ ngũxẽẽmaã meã tajanguxẽẽ i ngẽma Tupana naxwaxexũ rü jigũmaã itarũngũxmüẽ rü aixcuma tataãẽgü napexewa ja Tupana. ¹⁸Rũ jíxema ngẽmaãcü Cristucax maxũxẽ, rü Tupana rü tũmamaã nataãẽ, rü guxũma i duũxũgü rü ta tũmamaã nataãẽgü. ¹⁹Rũ ngẽmacax, ñngĩxã naxcax tadaugü i guxũma i nacũma i mexũ i jigũmaã tüxũ rũngũxmüẽxẽxũ! ;Rũ ngĩxã jigü tarũngũxẽẽ na jexeraãcü ijaexũcax i tóru õwa rü Tupanaãrũ orewa! ²⁰Rũ tama name i řacu rü õna na cungóũgagu icujanaxoxẽẽ i Tupanaãrũ puracü i cueneẽãrũ maxũwa. Rũ aixcuma nixĩ i guxũma i õnagü i namexũ i Tupanapexewa. Notürü wüxi i chixexũ nixĩ ega ngẽma õna i ingóxũgagu chixexũgu najixẽẽgu i taeneẽgü. ²¹Rũ ngẽmacax tama name i cunangõx i namachi, rü exna cujaxaxü ja wĩü, rü exna cunaxü i řacu i to, ega ngẽmagagu chixexũgu cunanguxẽẽgu i

cueneẽ i jaxõxũ. ²²Rũ ngẽxguma cuma nagu curũxĩnũgu na namexũ na cunangóxũ i ngẽxũrũxũmare i õna, rü Tupanapexewa rü name nixĩ i cuxicatama nüxũ cucuax i ngẽma. Rũ tataãẽ ja jíxema tũmaãẽwa nüxũ cuáxe na Tupanapexewa namexũ i ngẽma taxũxũ. ²³Notürü ngẽxguma wüxie nagu rũxĩnũgu na tama namexũ i Tupanapexewa na řacu rü õna na tangóxũ, rü pemaã nüxũ chixu rü chixexũ taxü ega tanangõxomagü, erü tũmaãẽwa nagu tarũxĩnũ na tama aixcuma namexũ i ngẽma taxũxũ. Rũ guxũma i ngẽma tũmaãẽwa nagu tarũxĩnũxũ na nachixexũ rü aixcuma pecadu taxü ega tanaxũamagu.

**Name nixĩ i cueneẽãrũ ngũchaũ
cuxü rü tama i cuxrũtama**

15 ¹Rũ jixema na meã jaxõgũxũ rü namaã iporaexũ i guxchaxũgü, rü name nixĩ i nüxũ tarũngũxẽẽ i ngẽma taeneẽgü i turaexũ i norü õwa rü tama guxchaxũgũmaã jaxna ñnũẽxũ. Rũ tama name i jigũguxicatama tarũxĩnũẽ rü tóxrũcaxicatama tadaugü. ²Notürü wüxichigü i jixema rü name nixĩ i taeneẽãxũ tanangũchaũxẽẽ na ngẽmaãcü nüxũ rũngũxẽẽxũcax na jexeraãcü jaxõõxũcax. ³Jerü woo ga Cristu rü tama noxrũtama ngũchaũ naxü. Notürü najanguxẽẽ ga jema Tupanaãrũ ore ga nhaxũ:

“Pa Chaunatũx, rü ngẽma duũxũgü i cumaã guxchigagũxũ, rü chamaã nixĩ i naguxchigagũxũ”, nhaxũ. ⁴Rũ guxũma ga jema nuxcũma ümatũxũ ga Tupanaãrũ orewa, rü

naxūmatū na tūxū nanguxēēxūcax na taguma nūxū rūxoexū ega woo tacū rū guxchaxū tūxū ūpetūgu. Rū jema Tupanaārū ore rū naxūmatū na tūxū nataāēēxūcax rū tūxū nūxū nacuaxēēxūcax na aixcuma Tupanaārū ixīgūxū. ⁵Rū Tupana nixī ja tūxū rūngūxēēcū na jaxna namaā ixīnūēxūcax i guxūma i guxchaxūgū. Rū nūma nixī i tūxū nataāēēxū. Rū chanaxwaxe i nūma ja Tupana pexū narūngūxēē na aixcuma pegū pengechaūgūechaxūcax i ngēma Ngechuchu ja Cristu pexū naxwaxexūrū. ⁶Rū chanaxwaxe na ngēmaācū pemaxēxū na guxāma i pema rū wūxigu nūxū peicuaxūūgūxūcax ja Tupana ja Nanatū ja tōrū Cori ja Ngechuchu ja Cristu.

**Duūxūgū i tama Judéugū
ixīgūxūmaā nūxū nixū i ore i mexū**

⁷Rū ngēmacax, jema Cristu pexū na dexūrū rū name nixī i wūxichigū meā pegū pejaxu na ngēmaācū Tupanaxū jacuaxūūgūxūcax i duūxūgū. ⁸Rū pemaā nūxū chixu rū Cristu nūma naxū na Judéugūxū janangūxēēxūcax, na jemaācū janguxēēāxūcax ga jema uneta ga nuxcūmaxūgūxū ga tōrū oxigūmaā nūxū jaxuxū ga Tupana. Rū jemaācū ga Cristu rū tūxū nūxū nadauxēē na aixcumacū na jīixū ja Tupana rū aixcuma janguxēēāxū i ngēma norū uneta. ⁹Rū jexgumariū ta ga Cristu rū nūma naxū naxcax i ngēma duūxūgū i tama Judéugū ixīgūxū na nūmagū rū ta Tupanaxū jacuaxūūgūxūcax naxcax na poraācū Tupanaāxū nangechaūtūmūūgūxū. Rū jemachiga

nixī ga jema Tupanaārū ore ga Dawī ūmatūxū ga nhaxū:

“Rū ngēmacax guxū i nachiūānecūāx i duūxūgūpexewa tá cuxū chicuaxū. Rū tá chorū wijaewa cuxū chataxēē”,

nhaxū. ¹⁰Rū toxnamana i Tupanaārū ore i ūmatūxūwa rū nhanagūrū:

“Pa Duūxūgū i Tama Judéugū Ixīgūxū, rū name nixī i pema rū wūxigu chorū duūxūgū i Judéugūmaā petaāēgū”,

nhanagūrū. ¹¹Rū toxnamana, rū nhanagūrū ta:

“Pa Duūxūgū i Tama Judéugū Ixīgūxū, rū name nixī i nūxū peicuaxūūgū ja tōrū Cori. Rū Pa Guxūma i Nachiūānecūāx i Duūxūgū, rū name nixī i penataxēē”,

nhanagūrū. ¹²Rū Ichaía rū ta nanaxūmatū rū nhanagūrū:

“Rū Dawī nanatū ja Jesíwa tá ne naxū i wūxi i nataa i tá Cristu ixīxū. Rū nūma tá nixī i norū āēxgacū jīixū i guxūma i ngēma duūxūgū i tama Judéugū ixīgūxū. Rū ngēma duūxūgū rū tá aixcuma nūxū najaxōgū rū tá ínananguxēēgū na jimagagu Tupana nūxū rūngūxēēgūxū”,

nhanagūrū. ¹³Rū nhuxma i pema na nūxū pejaxōgūxū rū chanaxwaxe i poraācū pexū nataāēēē ja jima Tupana ja pexū rūngūxēēcū na meā Cristuxū ípenanguxēēgūxūcax. Rū ngēmaācū i Tupanaāē i Ūnēxū rū tá pexū naporaxēē na jexeraācū Cristuxū ípenanguxēēgūxūcax. ¹⁴Pa

Chaueneġgūx, meāma nūxŭ chacuax na guxŭ i duŭxŭgūmaā pemecūmaxŭ, rŭ aixcuma Tupanaxŭ na pecuáxŭ, rŭ aixcuma meāma pegŭ peixucuxġgūxŭ.

¹⁵Notŭrŭ nhaā poperawa rŭ meāma pexcax chanaxūmatŭ i nhuxre i Tupanaārŭ ucuxġgŭ, erŭ tama chanaxwaxe i nūxŭ ipejarŭngūmaē. Rŭ tama chamuŭ na pexcax chanaxūmatŭxŭ i ngēmachiga jerŭ Tupana nixŭ ga choxŭ mucŭ na pemaā nūxŭ chixuxŭcax. ¹⁶Rŭ nūma nixŭ ga choxŭ namuxŭ na Ngechuchu ja Cristuarŭ puracŭ chaxŭxŭcax i natanŭwa i ngēma duŭxŭgŭ i tama Judġgŭ ixġgūxŭ. Rŭ ngēma puracŭ ga nawa choxŭ namuxŭ nixŭ na ngēma duŭxŭgūmaā nūxŭ chixuxŭ i ore i mexŭ na Tupanaxŭtawa chanagagŭxŭcax, na wŭxi i āmare i Tupana namaā taāxŭ i ngēma duŭxŭgŭ i Naāē i Üünexŭ imexġgūxŭ. ¹⁷Rŭ nhuxma na Ngechuchu ja Cristuarŭ duŭxŭ na chíxŭ, rŭ ngēmacax chataāē namaā i ngēma puracŭ i Tupanaāxŭ chaxŭxŭ. ¹⁸⁻¹⁹Rŭ nhuxma rŭ jema Cristu chorŭ maxŭwa ŭxŭchigaxŭxŭcatama nixŭ i chixuxŭ. Rŭ nūma nixŭ ga choxŭ nangŭxġēxŭ na Tupanaxŭtawa chanagagŭxŭcax ga jema duŭxŭgŭ i tama Judġgŭ ixġgūxŭ, na nūmagŭ rŭ ta Tupanaga naxŭnŭēxŭcax. Rŭ jemaācŭ chorŭ oremaā, rŭ chorŭ puracūmaā, rŭ cuaxruŭgŭ ga taxŭ ga Tupana ŭxŭmaā, rŭ Naāē i Üünexŭārŭ poramaā Tupanaxŭtawa chanagagŭ ga jema duŭxŭgŭ. Rŭ jemaācŭ Jerucharġŭwa rŭ guxŭwama nhuxmata Irŭricuarŭ naānewa meāma chajanguxġē na nūxŭ chixuxŭ ga jema ore i tŭxŭ maxġēxŭ i

Cristuchiga. ²⁰Rŭ jemaācŭ chapuracŭ na nūxŭ chixuxŭcax ga Tupanaārŭ ore i mexŭ ga ngextá taguma nhuxgu Cristuchigaxŭ inaxŭnŭēxŭwa ga duŭxŭgŭ. Jerŭ tama chanaxwaxe ga marŭ togŭ nūxŭ íxuxŭwa rŭ duŭxŭgŭ marŭ nūxŭ ícuáxŭwa nūxŭ na chixuxŭ ga jema ore. ²¹Rŭ jemachiga nixŭ ga Tupanaārŭ ore ga Ichaía ŭmatŭxŭ ga nhaxŭ:

“Rŭ jŭxema taguma Cristuchigaxŭ cuaxgŭxe, rŭ taguma nachigaxŭ ínŭēxġ, rŭ tá nūxŭ tacuaxgŭ i nachiga”,
nhaxŭ.

Pauro rŭ Romawa naxŭxchaŭ

²²Rŭ jema toxnamana na chapuracŭxŭcax nixŭ ga taxucŭrŭwa petanŭwa chaxŭxŭ woo muġxpŭxcŭnachirex jġma chaxŭxchaŭ.

²³Notŭrŭ nhuxma na marŭ chanaguxġēxŭ i ngēma puracŭ i toxnamana, rŭ nagu charŭxŭnŭ na petanŭwa chaxŭxŭ. Jerŭ nhuxgumamatama nixŭ ga nagu charŭxŭnŭēchaxŭ na petanŭwa chaxŭxchaŭxŭ. ²⁴Rŭ ngġxguma Espanhawa chaxŭxgu, rŭ nagu charŭxŭnŭ na woe pexŭtagu íchidauxŭ. Rŭ nagu charŭxŭnŭ na nhuxre i ngunexŭ ngġxma petanŭgu charŭxáxŭ. Rŭ wŭxi i chorŭ taāē tá nixŭ i ngēma. Rŭ ngēmawena rŭ chanaxwaxe i choxŭ perŭngŭxġē na Espanhawa chaxŭxcax. ²⁵Notŭrŭ i nhuxma rŭ Jerucharġŭwa tá chaxŭ, na ngēma chanangexŭcax i nhuxre i dŭeru naxcax i taeneġgŭ i ngēma ngġxmagŭxŭ. ²⁶Erŭ ngēma taeneġgŭ i jaxġgŭxŭ i

Machedóniãñewa rü Acajanewa ngëxmagüxũ, rü norü ngúchaũmaã nagu narüxĩnũē na ngĩxũ nanutaquexegüxũ i nhuxre i dïeru na ngëmaãcü nüxũ nangüxëēgüxũcax i taeneëgü i nüxũ nataxuxũ i Jerucharéũwa ngëxmagüxũ. ²⁷Rü ngëma taeneëgü i Machedóniãcüãx rü Acajacũãx rü norü me nixĩ na ngëmaãcü naxügüãxũ. Rü ngëma duũxügü rü aixcuma nüxũ nangëxma i norü ngetanü i taeneëgü i Judéugütanüwa. Erü ngëma taeneëgü i Judéugügagu nixĩ i ngëma togü i duũxügütanüwa nanguxũ i Tupanaãrü ore. Rü nhuxma rü name nixĩ i ngëma togü i duũxügü rü norü ngëmaxũmaã taeneëgü i Judéugü i jaxögüxũxũ narüngüxëēgü. ²⁸Rü ngëxguma chanaguxëēgu i ngëma puracü, rü ngëxguma taeneëgü i Judéugüna marü ngĩxũ chaxãxgu i ngëma dïeru, rü Espanhawa tá chaxũ. Rü ngëxguma ngëma chaxũxgu, rü tá woe pexũtagu íchidau. ²⁹Rü nüxũ chacuax rü ngëxguma petanüwa changuxgu, rü wüxigu tá tataãēgü, erü numa ja Cristu tá tüxũ nataãēxëē i ngëxguma ngëmaãcü wüxiwa ingëxmagügu. ³⁰Pa Chaueneëgüx, tórü Cori ja Ngechuchu ja Cristuégagu, rü ngëma na Naãēãrü ngüxëēmaã choxũ pengechaũxügü pexũ chacaxũ na Tupanana chauxcax peçaxũ i perü jumuxëwa. Rü ngëmaãcü tá choxũ perüngüxëē nawa i nhaã puracü i Tupana choxna ãxũ. ³¹¡Rü Tupanana peça na choxũ ínapoxũxũcax nüxna i ngëma Judéugü i Judéaanewa ngëxmagüxũ i tama jaxögüxũ! ¡Rü nüxna peça naxcax i ngëma taeneëgü i jaxögüxũ i Jerucharéũwa ngëxmagüxũ,

na taãēãcüma najauxgüãxũcax i ngëma dïeru i ngëma naxcax changexũ! ³²Rü ngëmaãcü ngëxguma Tupana naxwaxegu, rü taãēãcüma petanüwa tá changu, na wüxigu pemaã chataãēxũcax. ³³Rü chanaxwaxe na pemaã inaxãxũ ja Tupana ja tüxũ taãēxëēcü. Rü ngëmaãcü jüxũ.

Pauru rü nüxũ narümoxë ga jema duũxügü ga jaxögüxũ ga Romawa jexmagüxũ

16 ¹Rü nhuxma na petanüwa naxũchaũxũ i taejax i Febe, rü pemaã ngĩxũ chixu rü wüxi i taejax i mecü ijixĩ. Erü ngĩma rü nüxũ irüngüxëē i ngëma jaxögüxũ i Chëcreaarü ãñewa ngëxmagüxũ. ²Rü chanaxwaxe i meã ngĩxũ pejaxu, naégagu ja tórü Cori ja Ngechuchu, erü ngëma nixĩ i mexũ na penaxũxũ namaã i guxũma i jaxögüxũ. Rü chanaxwaxe i guxũma i tacü i ngĩxũ taxuxũwa rü ngĩxũ perüngüxëē, erü ngĩma rü poraacü togüxũ irüngüxëē, rü choxũ rü ta irüngüxëē. ³¡Rü nüxũ perümoxëgü i Prichira rü Aquiru! Rü nümagü rü chamücügü nixĩgü i Ngechuchu ja Cristuarü puracüwa. ⁴Rü nümagü rü ãñcümãxũwa nichocu na chauétüwa nachogüexũcax, na tama chajuxũcax ga chamax. Rü ngëmacax moxë nüxna chaxã. Rü tama chaxicatama moxë nüxna naxägü ta i guxũma i taeneëgü i jaxögüxũ i tama Judéugü ixĩgüxũ. ⁵¡Rü nüxũ perümoxëgü ta i guxũma i taeneëgü i Aquirupatawa ngutaquexegüxũ! ¡Rü ngëxgumarüũ ta nüxũ perümoxëgü ja chamücü ja nüxũ

changechaũcü ja Epenétu! Rũ nũma nixĩ ga nũxĩra Cristuaxũ jaxõõxũ ga Áchiaanewa. ⁶;Rũ ngĩxũ perũmoxẽgũ i Marĩa ga poraãcü petanũwa Tupanaãxũ puracũcü! ⁷;Rũ nũxũ perũmoxẽgũ i chautanũxũgũ i Ádrũnicu rũ Júnĩã ga wũxĩgu chamaã pocuexũ! Rũ nũmagũ nixĩ i jatũgũ i aixcuma Tupana imugũxũ i guxũma i jaxõgũxũ nũxũ ngechaũgũxũ. Rũ nũmagũ rũ nũxĩra chauxũpa Cristuaxũ najaxõgũ. ⁸;Rũ nũxũ perũmoxẽgũ ja Āpriãtu ja chamũcü ja nũxũ changechaũcü ja chauxrũũ tórũ Coriaxũ jaxõcü! ⁹;Rũ nũxũ perũmoxẽgũ ja Urubãnu ja tomũcü ixĩcü i Cristuarũ puracũwa! ;Rũ ngẽxgumarũũ ta nũxũ perũmoxẽgũ ja Estaqui ja nũxũ changechaũcü! ¹⁰;Rũ nũxũ perũmoxẽgũ ja Apere ja aixcuma tũxũ nũxũ dauxẽecũ na nhuxãcü Cristuaxũ jaxõõxũ! ;Rũ ngẽxgumarũũ ta nũxũ perũmoxẽgũ i Aristũburutanũxũgũ! ¹¹;Rũ nũxũ perũmoxẽgũ i chautanũxũ i Erudiũ! ;Rũ ngẽxgumarũũ ta nũxũ perũmoxẽgũ i Narschutanũxũ i tórũ Coriaxũ jaxõgũxũ! ¹²;Rũ ngĩxũ perũmoxẽgũ i Trifena rũ Trifosa! Rũ ngĩmagũ rũ tórũ Coriaxũ ipuracũe. ;Rũ ngẽxgumarũũ ta ngĩxũ perũmoxẽgũ i taejax i Pẽrsidi i ngĩxũ ingechaũgũcü! Rũ ngĩma rũ marũ poraãcü tórũ Coriaxũ ipuracũ. ¹³;Rũ nũxũ perũmoxẽgũ ja Rufu ja aixcuma meã tórũ Coriaxũ jaxõcü! ;Rũ ngẽxgumarũũ ta ngĩxũ perũmoxẽgũ i naẽ ga chauerũũ chamaã ixĩcü! ¹⁴;Rũ nũxũ perũmoxẽgũ i Achĩcritu, rũ Fregũti, rũ Erme, rũ Patrõba, rũ Erma, rũ guxũma i togũ i taeneẽgũ i natanũwa ngẽxmagũxũ! ¹⁵;Rũ nũxũ perũmoxẽgũ ta i Firũgu, rũ

Jũria, rũ Nerẽu, rũ naẽjax, rũ Orĩpa, rũ guxũma i togũ i taeneẽgũ i jaxõgũxũ i natanũwa ngẽxmagũxũ! ¹⁶Rũ chanaxwaxe i pegũ pengechaũgũãcũma pegũ perũmoxẽgũ i wũxichĩgũ. Rũ guxũma i ngẽma jaxõgũxũ i toxnamana ngẽxmagũxũ, rũ pexũ narũmoxẽgũ. ¹⁷Pa Chaueneẽgũx, pexũ chacaaxũ na pegũna pedaugũxũcax nũxna i ngẽma duũxũgũ i pexũ itojechaũxũ rũ chixexũgu pexũ jixẽẽgũchaũxũ. Erũ ngẽma duũxũgũari ngũxẽẽtae rũ tama namaã nawũxĩgu i ngẽma ngũxẽẽtae ga noxri pejauxgũxũ ga jexguma noxri pejaxõgũgu. Rũ name nixĩ i noxtacũma nũxna peixĩgachi i ngẽma duũxũgũ rũ tama natanũgu pexãgũ. ¹⁸Erũ ngẽma duũxũgũ rũ tama tórũ Cori ja Ngechuchu ja Cristuarũ ngũchaũ naxũgũ, notũrũ noxrũtama ngũchaũ nixĩ i naxũgũxũ. Rũ ore i tauxchaxũgũmaã najaxucũxẽgũ i duũxũgũ, rũ ngẽmaãcü nanawomũxẽẽgũ i ngẽma duũxũgũ i tama meã nũxũ cuaxgũxũ. ¹⁹Rũ guxũma i duũxũgũ nũxũ nacuaxgũ na aixcuma meã Tupanaga pexĩniũxũ i pemax. Rũ ngẽmacax pemaã chataãe i chamax. Rũ chanaxwaxe na meã nũxũ pecuãxũ i țacũ nixĩ i mexũ i Tupanapexewa na penaxũxũcax i ngẽma. Notũrũ ngẽma Tupanapexewa chixexũ, rũ nũxna peixĩgachi na tama nagu pejixũcax! ²⁰Rũ ngẽxguma ngẽmaãcü meã pemaxẽgu rũ nũma ja Tanatũ ja Tupana ja tũxũ taãẽxẽecũ rũ tá pexũ naporaexẽe na aixcuma nũxũ perũjexeraxũcax i Chataná. Rũ chanaxwaxe i tórũ Cori ja Ngechuchu ja Cristu pemaã inarũxãũx rũ pexũ narũngũxẽe. ²¹Rũ pexũ narũmoxẽ ja

Timúteu ja chamücü ixícü i Tupanaãrũ puracũwa. Rũ ngëxgumarũ ta pexũ narũmoxëgũ i chautanũxũgũ i Rúchiu, rũ Jacháũ rũ Sochipátru. ²²Rũ chama i Tërsiu na chanaxumatũxũ i nhaã popera, rũ chama rũ ta pexũ charũmoxë naégagu ja tórũ Cori. ²³Rũ pexũ narũmoxë ta ja Gaju ja napatawa changëxmacü. Rũ nüma rũ inanaxã ja daa napata na nawa nangutaquexegũxũcax i guxũma i jaxögũxũ. Rũ ngëxgumarũ ta pexũ narũmoxëgũ i Erastu i daa ããneãrũ dïëruarũ darũũ ixĩxũ, rũ taeneë i Cuartu. ²⁴Rũ chanaxwaxe i tórũ Cori ja Ngechuchu ja Cristu pexũ narũngũxëë i guxãma i pemax. Rũ ngëmaãcü jĩixũ.

**Pauro rũ Tupanaxũ jacuaxũũãcũma
nanaguxëë i norũ popera**

²⁵⁻²⁶¡Rũ nhuxmax, rũ ngĩxã nüxũ ticuaxũũgũ ja Tanatũ ja Tupana! Rũ nüma nüxũ nangëxma i pora na pexũ naporaexëëxũcax na meã pejaxögũamaxũcax i ngëma norũ ore i tũxũ maxëëëxũ tamaã nüxũ ixuxũrũũ. Rũ ngëma nixĩ i ore i guxũwama nüxũ

chixuxũ rũ namaã changũexëëtaexũ i Ngechuchu ja Cristuchiga. Rũ ngëmatama ore i Cristuchiga rũ taxchaxwa naxëxũgu ga noxrix, notürũ i nhuxma ja Tupana rũ marũ tũxũ nüxũ nacuaxëë i ngëma. Rũ nuxcũma taũta naãne üxgu rũ Tupanaxĩcatama nüxũ nacuax ga jema, notürũ i nhuxma rũ norũ orearũ uruũgũ ũmatũxũ ga orewa taxcax nanangoxëë. Rũ ngëma ore rũ namaã nawũxigu ga jema ore ga nuxcũma nüxũ jaxuxũ ga Tupana ja guxũguma maxëchacü. Rũ nhuxma ja Tupana rũ guxũwama nanamugũ i norũ orearũ uruũgũ na guxũ i duũxũgũmaã nüxũ na jaxugũexũcax i ngëma ore i Cristuchiga na nüxũ jaxögũãxũcax rũ naga na naxĩnũëxũcax. ²⁷Rũ nüma ja Tupana rũ nüxĩcatama nixĩ i Tupana jĩixũ, rũ nüxĩcatama nixĩ i guxũxũ nacuaxũ. ¡Rũ nhuxmax, rũ ngĩxã guxũguma nüxũ ticuaxũũgũ, erũ Nane ja Ngechuchu ja Cristu rũ poraãcü tũxũ narũngũxëë! Rũ ngëmaãcü jĩixũ.

*Rũ nuãma pexna,
Pauro*